

摛藻堂四庫全書薈要

史部

欽定四庫全書叢書要

史部

通志卷一百五十七

詳校官員外郎臣楊世綸



欽定四庫全書薈要卷九千七十五

史部

通志卷一百五十七

宋右廸功郎鄭樵漁仲撰

傳第七十

周

陸騰

周惠達

馮景

蘇綽

椿弟

盧辯

光弟

韋孝寬

子總兄龜

韋瑱

柳虯

虯弟子帶韋慶子弘

盧辯

光弟

韋孝寬

弟

長孫紹遠

盧柔

弟澄

裴俠

裴寬

寬弟

裴果

裴文舉 崔猷 崔士謙

弟訖

李昶 鄭道邕

鄭偉 司馬裔 司馬消難

薛端裕

弟薛善

弟慎薛

寘 薛燈

陸騰字顯聖代人魏東平王俟玄孫也父旭魏太和中徵拜中書博士稍遷散騎常侍頗明易緯候之學知天下將亂隱於太行山屢徵不起卒騰慷慨有大節從爾朱榮平葛榮以功賜爵清河縣伯稍遷通直散騎常侍及魏孝武西遷騰時使青州遂沒於鄴東魏拜征西將

軍陽城鎮將大統九年大軍東討陽城騰拒守月餘城  
陷被執文帝釋而禮之問其東間消息騰盛論東州人  
物又敘述時事辭理抑揚文帝笑曰卿真不背本也即  
拜帳內大都督未幾除太子庶子遷武衛將軍騰既為  
文帝所知思欲立功不願內職及安康賊黃衆寶等作  
亂結連漢中衆數萬人攻圍東梁州城中糧盡詔騰率  
軍自子午谷以援之與戰大破之軍還拜龍州刺史文  
帝謂騰曰今欲通江由路直出南秦卿宜善思經略騰

曰臨機制變未敢預陳文帝曰此是卿取柱國之日卿其勉之即解所服金帶賜之州人李廣嗣李武等據險歷攻不能制騰造飛梯夜襲破之執廣嗣等於鼓下其黨有任公忻圍逼州城請免廣嗣及武即散兵請罪騰謂將士曰吾不殺廣嗣等可謂墮軍實而長寇讎即斬廣嗣及武以首示之於是出兵奮擊盡獲之進位驃騎大將軍開府儀同三司轉江州刺史進爵上庸縣公陵州木籠獠恃險暴橫每行抄劫詔騰討之獠既因山為

城攻之未可拔騰遂於城下多設聲樂及諸雜妓示無  
戰心諸賊累棄其兵仗或攜妻子臨城觀樂騰知其無  
備遂密縱兵奮擊諸賊惶懼不知所為盡破之斬首萬  
級俘獲五千人明帝初陵眉戎等八州夷夏並反衆數  
萬人攻破郡縣騰討平之武成元年詔騰入朝明帝面  
勅之曰益州險遠非親勿居故令齊公憲作鎮卿文武  
之備已著遐邇兵馬鎮防皆當委卿統攝於是徙為隆  
州刺史隨憲入蜀及趙公招代憲復請留之遷隆州總

管領刺史保定二年資州石磐人反殺郡守據險自守  
州軍不能制騰率軍討擊盡破斬之蠻獠互反所在蜂  
起山路險阻難得掩襲騰遂量山川形勢隨便開道蠻  
獠畏威承風請服所開之路多得古銘並是諸葛亮桓  
溫舊道是年鐵山獠抄斷內江路驛使不通騰乃進軍  
討之出其不意一下其三城招納降附者三萬戶帝  
以騰母在齊未令東討適有其親屬自齊還朝者晉公  
護奉令偽告騰云齊為無道已誅公家母兄並從塗炭

蓋欲發其怒也騰乃發哀泣血志在復讎四年齊公憲  
與晉公護東征請騰為副趙公招時在蜀復欲留之晉  
公護與招書曰今朝廷令齊公埽除河洛欲與此人同  
行汝彼無事且宜借吾也於是命騰馳傳還朝副憲東  
討天和初信州蠻賊據江硖反叛連結二千餘里自稱  
王侯詔騰討之騰先趣益州募驍勇具樓船沿江而下  
軍至湯谷分道奮擊所向摧破乃築京觀以旌武功涪  
陵郡守蘭休祖據地方二千里阻兵為亂復詔騰討之

拔其魚令城又破銅槃等七柵騰自在龍州至是前後  
破平諸賊凡賞得奴婢八百口馬牛稱是於是巴蜀悉  
定詔令樹碑紀績焉四年遷江陵總管陳遣其將章昭  
達圍江陵衛王直聞有陳寇遣大將軍趙閭李遷哲等  
率步騎赴之並受騰節度時遷哲等守外城陳將程文  
季雷道勤夜來掩襲遷哲等驚亂不能抗禦騰夜遣開  
門奮擊大破之陳人奔潰道勤中流矢而斃陳人決龍  
川寧朔隄水灌江陵城騰親率將士戰於西隄破之陳

人乃遁六年進位柱國爵上庸郡公建德二年徵拜大  
司空尋出為涇州總管宣政元年冬薨於京師贈太尉  
公諡曰定子元嗣元字士鑒入關時年七歲仕齊為奉  
朝請成平縣令齊平武帝見元特加勞勉即拜地官府  
都上士大象末為隋文帝相府外兵參軍元弟融字士  
顯最知名少歷顯職大象末位至大將軍定陵縣公  
周惠達字懷文章武文安人也父信歷樂鄉平舒成平  
三縣令皆以廉能見稱惠達幼有節操好讀書美容貌

魏齊王蕭寶夤為瀛州刺史召惠達及河間馮景同在  
閣下甚禮之及寶夤入朝惠達隨入洛陽寶夤西征惠  
達復隨入關寶夤除雍州刺史令惠達使洛陽未還而  
寶夤謀反聞於京師以惠達是其行人將執之惠達乃  
私馳還至潼關遇大使楊侃侃謂曰何故入虎口惠達  
曰蕭王必為左右所誤今往庶其改圖及至寶夤反形  
已露不可彌縫遂用惠達為光祿勲中書舍人寶夤既  
敗唯惠達等數人從之寶夤語惠達曰人生富貴左右

咸言盡節及遭厄難乃知歲寒也賀拔岳為關中大行  
臺惠達為岳府府屬岳為侯莫陳悅所害惠達遁入漢  
陽之積麥崖悅平歸於文帝文帝復以為府司馬便委  
任焉文帝為大將軍大行臺以惠達為行臺尚書大將  
軍府司馬封文安縣子文帝出鎮華州留惠達知後事  
時既承喪亂庶事多闕惠達營造戎仗儲積倉糧簡閱  
士馬以濟軍國之務甚為朝廷所稱後拜中書令進爵  
為公大統四年兼尚書右僕射其年文帝與魏文帝東

討令惠達輔魏太子居守總留臺事及芒山失律人情  
駭動趙青雀據長安子城反惠達奉太子出渭橋北以  
禦之軍還青雀等誅拜吏部尚書久之復為右僕射自  
關右草創禮樂缺然惠達與禮官損益舊章是以儀軌  
稍備魏文帝因朝奏樂顧謂惠達曰此卿功也惠達雖  
居顯職性謙退善下人盡心勤公愛拔良士以此皆敬  
而附之薨子題嗣隋開皇初以惠達著績前代追封蕭

國公

馮景字長明河間武垣人也父傑為伏興令景少與周惠達友俱以客從蕭寶夤寶夤後為尚書右僕射引景領尚書都令史正光中寶夤為關西大行臺景又為行臺都令史及寶夤敗還長安或議歸罪關下或言留州立功景曰擁兵不還此罪將大寶夤不從遂反及寶夤平景方得還洛朝廷聞景有諫言故不罪之後事賀拔岳為行臺郎岳使景詣齊神武察其行事神武聞岳使至甚有喜色問曰賀拔公詎憶吾邪與景軟血託岳為

兄弟景還以狀報岳岳曰此姦有餘而實不足自古王  
臣無私盟者也吾料之熟矣岳北合費也頭東引紇豆  
陵伊利西總侯莫陳悅河州刺史梁景叡及酋渠為盟  
誓共會平涼移軍東下懼有專任之嫌使景啓孝武帝  
帝甚悅又為岳大都督府從事中郎侯莫陳悅平文帝  
使景於京師告捷帝有西遷意因問關中事勢景勸帝  
西遷後以迎孝武功封高陽縣伯除散騎常侍行臺尚  
書大統初詔行涇州事卒於官

蘇綽字令綽武功人魏侍中則之九世孫也累世有名  
石父協武功郡守綽少好學博覽羣書尤善算術從兄  
讓為汾州刺史文帝餓於都門外臨別謂曰卿家子弟  
之中誰可任用者讓因薦綽文帝乃召為行臺郎中在  
官歲餘未見知然諸曹疑事皆詢於綽而後定所行公  
文綽又為之條式臺中咸稱其能文帝與僕射周惠達  
論事惠達不能對請出外議之乃召綽以告其事綽即  
為量定惠達入呈文帝稱善曰誰與卿為此議者惠達

以綽對因稱其有王佐之才文帝曰吾亦聞之久矣尋除著作佐郎屬文帝與公卿往昆明池觀漁行至城西故倉地顧問左右莫有知者或曰蘇綽博物多通請問之乃召綽問具以狀對文帝大悅因問天地造化之始歷代興亡之迹綽既有口辯應對如流文帝益嘉之乃與綽並馬徐行至池竟不施網罟而還遂留綽至夜問以政道文帝卧而聽之綽於是指陳帝王之道兼述申韓之要文帝乃起整衣危坐不覺膝之前席語遂達曙

不厭詰朝乃謂周惠達曰蘇綽真奇士吾方任之以政  
即拜大行臺左丞參典機密自是寵遇日隆綽始制文  
案程式朱出墨入及計帳戶籍之法大統三年齊神武  
三道入寇諸將咸欲分兵禦之獨綽意與文帝同遂併  
力拒竇泰擒之於潼關封美陽縣伯十一年授大行臺  
度支尚書領著作兼司農卿文帝方欲革易時政務行  
彊國富民之道故綽得盡其智能贊成其事減官員置  
二長并置屯田以資軍國又為六條詔書奏施行之其

一先脩心曰凡今之方伯守令皆受命天朝出臨下國論其尊貴並古之諸侯也是以前代帝王每稱共治天下者唯良守宰耳明知百僚卿尹雖各有所司然其治民之本莫若守宰之最重也凡治民之體當先治己心心者一身之主百行之本心不清靜則思慮妄生思慮妄生則見理不明見理不明則是非謬亂是非既亂則一身不能自治安能治人也是以治民之要在於清心而已夫所謂清心者非不貪貨財之謂乃欲使心氣清

和志意端靜心和志靜則邪僻之慮無自而作邪僻不  
作則凡所思念無不皆得至公之理率至公之理以臨  
其人則彼下人孰不從化是以稱治民之本先在治心  
其次又在治身凡人君之身者乃百姓之表一國之的  
也表不正不可求直影的不明不可責射中今君身不  
能自治而望治百姓是猶曲表而求直影也君行不能  
自脩而欲百姓脩行者是猶無的而責射中也故為人  
君者必心如清水形如白玉躬行仁義躬行孝悌躬行

忠信躬行禮讓躬行廉平躬行儉約然後繼之以無倦  
加之以明察行此八者以訓其人是以其人畏而愛之  
則而象之不待家教目見而自興行矣其二敦教化曰  
天地之性唯人為貴明其有中和之心仁恕之行異於  
木石不同禽獸故貴之耳然性無常守隨化而遷化於  
敦樸者則質直化於澆偽者則浮薄浮薄者則衰弊之  
風質直者則淳和之俗衰弊則禍亂交興淳和則天下  
自治自古安危興亡無不皆由所化也然世道雕喪已

數百年大亂滋甚且二十載人不見德唯兵革是聞上無教化唯刑罰是用而中興始爾大難未弭加之以師旅因之以饑饉凡百草創率多權宜致使禮讓弗興風俗未反比年稍登稔徭賦差輕衣食不缺則教化可脩矣凡諸牧守令長各宜洗心革意上承朝旨下宣教化者貴能扇之以淳風浸之以太和被之以道德示之以朴素使百姓亹亹日遷於善邪偽之心嗜慾之性潛以消化而不知其所以然此之謂化也然後教之以孝悌

使人慈愛教之以仁順使人和睦教之以禮義使人敬讓慈愛則不遺其親和睦則無怨於人敬讓則不競於物三者既備則王道成矣此之謂教也先王之所以移風易俗還淳反素垂拱而臨天下以至於太平者莫不由此此之謂要道也其三盡地利曰人生天地之間衣食為命食不足則饑衣不足則寒饑寒切體而欲使人興行禮讓者此猶逆坂走丸勢不可得也是以古之聖王知其若此先足其衣食然後教化隨之夫衣食所以

足者由於地利盡地利所以盡者由於勸課有方主此  
教者在乎牧守令長而已人者冥也智不自周必待勸  
教然後得盡其力諸州郡縣每至歲首必戒勅部人無  
問少長但能操持農器者皆令就田墾發以時勿失其  
所及布種既訖嘉苗須理麥秋在野蠶停於室若此之  
時皆宜少長悉力男女併功若揚湯救火寇盜之將至  
然後可使農夫不失其業蠶婦得就其功若游手怠惰  
早歸晚出好逸惡勞不勤事業者則正長牒名郡縣守

令隨事加罰罪一勸百此則明宰之教也夫百畝之田必春耕之夏種之秋收之然後冬食之此三時者農之要月也若失其一時則穀不可得而食故先王之戒曰一夫不耕天下必有受其饑者一婦不織天下必有受其寒者若此三時不務省事而令人廢農者是則絕人之命驅以就死然單劣之戶及無牛之家勸令有無相通使得兼濟三農之隙及陰雨之暇又當教人種桑植果藝其蔬菜脩其園圃畜育雞豚以備生生之資以供

養老之具夫為政不欲過碎碎則人煩勸課亦不容太  
簡簡則人怠善為政者必消息時宜而適煩簡之中故  
詩曰不剛不柔布政優優百祿是道如不能爾則必陷  
於刑辟矣其四擢賢良曰天生蒸黎不能自化故必立  
君以理之人君不能獨理故必置臣以佐之上自帝王  
下及列國置臣得賢則安失賢則亂此乃自然之理百  
王不能易也今刺史縣令悉有僚吏皆佐助之人也刺  
史府官則命於天朝其州吏以下並牧守自置自昔以

來州郡大夫但取門資多不擇賢良末曹小吏唯試刀筆並不問志行夫門資者乃先世之爵祿無妨子孫之愚瞽刀筆者乃身外之末材不廢性行之澆偽若門資之中而得賢良是則策騏驥而取千里也若門資之中而得愚瞽是則土牛木馬形似而用非不可以涉道也若刀筆之中而得志行是則金相玉質內外俱美實為人寶也若刀筆之中而得澆偽是則飾畫朽木悅目一時不可以充棟樑之用也今之選舉者當不限資蔭唯

在得人苟得其人自可起廝養而為卿相則伊尹傅說  
是也而況州郡之職乎苟非其人則丹朱商均雖帝王  
之胤不能守百里之封而況於公卿之胄乎由此而言  
官人之道可見矣凡所求材藝者為其可以理人若有  
材藝而以正直為本者必以材而為理也若有材藝而  
以姦偽為本者將因其官而亂也何致化之可得乎是  
故將求材藝必先擇志行善者則舉之其志行不善則  
去之而今擇人者多云邦國無賢莫知所舉此乃未之

思也非適理之論所以然者古人有言明主聿興不降  
佐於昊天大人基命不擢才於后土常引一世之人理  
一世之務故殷周不待稷契之臣魏晉無假蕭曹之佐  
仲尼曰十室之邑必有忠信如丘者焉豈有萬家之都  
而云無士但求之不勤擇之不審或授之不得其所任  
之不盡其材故云無耳古人云千人之秀曰英萬人之  
英曰雋今之智効一官行聞一邦者豈非近英雋之士  
也但能勤而審之去虛取實各得州郡之最而用之則

人無多少皆足化矣孰云無賢夫良玉未剖與瓦石相  
類名驥驥未馳與駿馬相雜及其剖而瑩之馳而試之玉  
石駕驥然後始分彼貧士之未用也混於凡品竟何以  
異要任之以事業責之以成務方與彼庸流較然不同  
昔呂望之屠釣百里奚之飯牛甯生之扣角管夷吾之  
三敗當此之時悠悠之徒豈謂其賢及升王朝登霸國  
積數十年功成事立始識其奇士也於是後世稱之不  
容於口彼瓊瑋之材不世之傑尚不能以未遇之時自

異於凡品況降此者哉若必待太公而後用是千載無  
太公必待夷吾而後任是百世無夷吾所以然者士必  
從微而至著功必積小以至大豈有未任而已成不用  
而先達也若識此理則賢可求士可擇得賢而任之得  
士而使之則天下之理何向而不可成也然善官人者  
必先省其官官省則善人易充善人易充則事無不理  
官煩則必雜不善之人雜不善之人則政必有得失故  
語曰官省則事省事省則人清官煩則事煩事煩則

濁清濁之由在於官之煩省案令吏員其數不少昔人  
殷事廣尚能克濟況今戶口減耗依員而置猶以為少  
如聞在下州郡尚有兼假擾亂細人甚為無理諸如此  
輩悉宜罷黜無得冒常非直州郡之官宜須善人爰至  
黨族間里正長之職皆當審擇各得一鄉之選以相監  
統夫正長者理人之基基不傾者上必安凡求賢之路  
自非一途然所以得之審者必由任而試之考而察之  
起於居家至於鄉黨訪其所以觀其所由則人道明矣

賢與不肖別矣率此以求則庶無愆悔矣其五恤獄訟  
曰人受陰陽之氣以生有情有性性則為善情則為惡  
善惡既分賞罰隨焉賞罰得中則怨止而善勸賞罰不  
中則人無所措手足而怨叛之心生是以先王重之特  
加戒慎者欲使察獄之官精心悉意推究根源先之以  
五聽參之以徵驗妙覩情狀窮鑒隱伏使姦無所容罪  
人必得然後隨事加刑輕重皆當舍過矜愚得情勿喜  
又能消息情理斟酌禮律無不曲盡人心而遠明大教

使獲罪者如歸此則善之上者也然宰守非一不可人  
人皆有通識推理求情時或難盡唯當率至公之心去  
阿枉之志務求曲直念盡平當聽察之理必窮所見然  
後考訊以法不可不暴有疑則從輕未審不妄罰隨事  
斷理獄無停滯此亦其次若乃不仁恕而肆其殘暴同  
人木石專用捶楚巧詐者雖事彰而獲免辭弱者乃無  
罪而被罰有如此者斯則下矣非共理所寄今之宰守  
當勤於中科而慕其上善如在下條則刑所不赦又當

深思遠大念存德教先王之制曰與殺無辜寧赦有罪  
與其害善寧其利淫明必不得中寧濫捨有罪不謬害  
善人也今之從政者則不然深文巧効寧致善人於法  
不免有罪於刑所以然者非皆好殺人也但云為吏寧  
酷可免後患此則情有自便不念至公奉法如此皆姦  
人也夫人者天地之貴物一死不可復生然楚毒之下  
以痛自誣不被申理遂陷刑戮者將恐往往而有是以  
自古以來設五聽三宥之法著明慎庶獄之典此皆愛

人甚也凡伐木殺草田獵不順尚違時令而虧帝道況  
刑罰不中濫害善人寧不傷天心犯和氣和氣損而欲  
陰陽調適四時順序萬物阜安蒼生悅樂者不可得也  
故語曰一夫吁嗟王道為之傾覆正謂此也凡百宰守  
可無慎乎若深姦巨猾傷化敗俗悖亂人倫不忠不孝  
故為背道殺一利百以清王化重刑可也識此二途則  
刑政盡矣其六均賦役曰聖人之大寶曰位何以守位  
曰仁何以聚人曰財以仁守位國而無財位不可守是

故三五以來皆有征稅之法雖輕重不同而濟用一也今寇逆未平軍國費廣雖未遑減省以卹人瘼然宜令平均使下無怨平均者不舍豪彊而徵貧弱不縱姦巧而困愚拙此之謂均也故聖人曰蓋均無貧然財貨之生其均不易紡績起於有漸非旬日之間所可造次必須勸課使豫營理絹鄉先事織紝麻土早脩紡績及時而備至時而輸故王賦獲供下人無困如其不豫勸戒臨時迫切復恐稽緩以為已過捶扑交至取辦目

前富商大賈緣茲射利有者從之貴愛無者與之舉息  
輸稅之人於是興矣租稅之時雖有大式至於斟酌貧  
富差次先後皆事起於正長而繫之於守令若斟酌得  
所則政和而民悅若檢理無方則吏姦而人怨又差發  
徭役多不存意致令貧弱者或重徭而遠戍富彊者或  
輕使而近防守令用懷如此不存卹民之心皆王政之  
罪人也文帝甚重之常置諸坐右又令百司習誦之其  
牧守令長非通六條及計帳者不得居官自有晉之季

文章競為浮華遂以成俗文帝欲革其弊因魏帝祭廟  
羣臣畢至乃命綽為大誥奏行之其詞曰唯中興十有  
一年仲夏庶邦百辟咸會於王庭柱國泰洎羣公列將  
莫不來朝時乃大稽百憲敷於庶邦用綏我王度皇帝  
若曰昔堯命羲和允釐百工舜命九官庶績咸熙武丁  
命說克號高宗時休哉朕其欽若格爾有位胥暨我太  
祖之庭朕將不命汝以厥官六月丁巳皇帝朝格於太  
廟凡厥具僚罔不在位皇帝若曰咨我元輔羣公列將

百辟卿士庶尹御事朕唯寅敷祖宗之靈命稽於先王  
之典訓以大誥於爾在位昔我太祖神皇肇膺明命以  
創我皇基烈祖景宗廓開四表底定武功暨乎文祖誕  
敷文德冀惟孝武不遺其舊自時厥後陵夷之弊用興  
大難於彼東土則我黎庶咸墜塗炭惟台一人纘戎下  
武夙夜祗畏若涉大川罔識攸濟是用稽於帝典揆於  
王度拯我民瘼惟彼哲王示我通訓曰天生黎蒸罔克  
自乂上帝降鑒厥聖植元后以乂之時惟元后弗克獨

又博求明德命百辟羣吏以佐之肆天之命辟辟之命  
官惟以恤人弗惟逸豫辟惟元首黎元惟趾股肱惟弼  
上下一體各勤攸司茲用克臻於皇極故皇其彝訓曰  
后克艱厥后臣克艱厥臣政乃乂今台一人膺天之嘏  
既陟元后股肱百辟乂服我國家之命罔不咸守厥職  
嗟后弗艱厥后臣弗艱厥臣政於何弗繹嗚呼艱哉凡  
爾在位其敬聽命皇帝若曰柱國唯四海之不造載繇  
二紀我太祖烈祖之用命用錫我以元輔國家將墜公

惟棟梁皇之弗極公惟作相百揆侃度公惟大錄公其  
允文允武克明克乂迪七德敷九功龕暴除亂下綏我  
蒼生傍施於九正若伊之在商周之有呂說之相丁用  
保無疆之祚皇帝若曰羣公太宰太尉司徒司空惟公  
作朕鼎足以弼於朕躬宰惟天官克諧六職尉惟司武  
武在止戈徒惟司衆敬敷五教空惟司土利用厚生惟  
時三事若三階之在天惟茲四輔若四時之成歲天工  
人其代諸皇帝若曰列將汝惟鷹揚作朕爪牙寇賊姦

究蠻夷猾夏汝徂征綏之以惠董之以威刑期無刑萬  
邦咸寧俾八表之内莫違朕命時汝功皇帝若曰庶邦  
列辟汝惟守土作民父母人惟不勝其饑故先王重農  
不勝其寒故先王貴女工人之不率於孝慈則骨肉之  
恩薄弗惇於禮讓則爭奪之萌生惟茲六物實為教本  
嗚呼為上克寬寬則人怠齊之以禮不剛不柔稽極於  
道皇帝若曰卿士庶尹凡百御事王省惟歲卿士惟月  
庶尹惟日御事惟時歲月日時罔易其度百憲咸貞庶

續其凝嗚呼惟若王官陶鈞萬國若天之有斗斟元氣  
酌陰陽弗失其和蒼生永賴惇其序萬物以傷時惟艱  
哉皇帝若曰惟天地之道一陰一陽禮俗之變一文一  
質爰自三五以迄於茲匪惟相革惟其救弊匪惟相襲  
惟其可久唯我有魏承乎周之末流接秦漢遺弊襲魏  
晉之華誕五代澆風因而未革將以穆俗興化庸可暨  
乎嗟我公輔庶僚列辟朕惟否德其一朕心力祗慎厥  
艱克遵前王之丕顯休烈弗敢怠荒咨爾在位亦叶於

朕心惇德允元惟厥艱是務克損厥華即厥寶背厥僞  
崇厥誠勿讐勿忘一乎三代之彝典歸於道德仁義用  
保我祖宗之丕命荷天之休克綏我萬方永康我黎庶  
戒之哉朕言不再柱國泰洎庶僚百辟拜手稽首曰亶  
聰明作元后元后作民父母惟三五之王率繇此道用  
臻於刑措自時厥後歷千載未聞惟帝念功將反叔世  
遂致於雍熙庸錫降丕命於我羣臣博哉王言非言之  
難行之實難臣聞靡不有初鮮克有終高書曰終始惟

一德乃日新惟帝敬厥始慎厥終以躋日新之德則我  
羣臣敢不夙夜對揚休命惟茲大誼未光於四表以邁  
種德俾九域幽遐咸昭奉元后之明訓率遷於道永膺  
無疆之休帝曰欽哉自是之後文筆皆依此體綽性儉  
素不事產業家無餘財以海內未平常以天下為己任  
博求賢俊共弘政道凡所薦達皆至大官文帝推心委  
任而無間言或出遊嘗預署空紙以授綽若須有處分  
則隨事施行及還啓知而已綽常謂為國之道當愛人

如慈父訓人如嚴師每與公卿議論自晝達夜事無巨細若指諸掌積思勞倦遂成氣疾十二年卒於位年四十九文帝痛惜之哀動左右及將葬乃謂公卿曰蘇尚書平生謙約吾欲全其素志便恐悠悠之徒有所未達如其厚加贈謚又乖宿昔相知之道進退惟谷孤有疑焉尚書令史麻瑤越次而進曰昔晏子齊之賢大夫一狐裘三十年及其死也遣車一乘齊侯不奪其志綽既操履清白謙挹自居愚謂宜從儉約以彰其美文帝曰

善因薦瑤於朝廷及綽歸葬武功惟載以布車一乘文  
帝與羣公步送出同州郭門外文帝親於車後酌酒而  
言曰尚書平生為事妻子兄弟不知者吾皆知之惟爾  
知吾心吾知爾意方欲共定天下不幸遂捨吾去柰何  
舉聲一慟不覺危墜於手至葬日又遣使祭以太牢文  
帝自為其文綽又著佛性論七經論並行於世明帝二  
年以綽配太祖廟庭子威嗣威隋史有傳綽弟椿字令  
欽性廉慎沈勇有決斷魏正光中關右賊亂椿應募討

之受盜寇將軍以功累遷中散大夫賜爵美陽子大統  
初拜鎮東將軍金紫光祿大夫賜姓賀蘭氏後除都督  
行弘農郡事椿當官彊濟特為文帝所知十四年置黨  
州鄉師自非鄉望允當衆心不得預焉乃令驛追椿領  
鄉兵其年破槃頭氐有功除散騎常侍加大都督十六  
年征隨郡軍還除武功郡守既為本邑以清儉自居小  
大之政必盡忠恕進爵為侯位驃騎大將軍開府儀同  
三司大都督卒子植嗣

盧辯字景宣范陽涿人累世儒學父靜魏太常丞辯少好學博通經籍正光初舉秀才為太學博士以大戴禮未有解詁辯乃注之其兄景裕為當時碩儒謂辯曰昔侍中注小戴今爾注大戴庶纂前修矣侍中辯叔父同也節閔帝立除中書舍人屬齊神武起兵信都既破爾朱氏遂鼓行指洛節閔遣辯持節勞之於鄴神武令辯見其所奉中興主辯抗節不從神武怒曰我舉大義誅羣醜車駕在此誰遣爾來辯抗言酬答守節不撓神武

異之捨而不逼孝武即位以辯為廣平王贊師永熙二年平等浮屠成孝武會萬僧於寺石佛低舉其頭終日乃止帝禮拜之辯曰石立社移自古有此陛下何怪及帝入關事起倉卒辯不及至家單馬而從或問辯曰得辯家不辯曰門外之道以義斷恩復何辯也帝至長安封范陽縣公授給事黃門侍郎領著作加本州大中正文帝以辯有儒術甚禮之朝廷大議常召顧問遷太子少保領國子祭酒趙青雀之亂魏太子出居渭北辯時

隨從亦不告家人其執志敢決皆此類也尋除太常卿  
太子少傅魏太子及諸王等皆行束脩之禮受業於辯  
進爵范陽郡公轉少師自魏末離亂孝武西遷朝儀涙  
墜於時朝廷憲章乘輿法服金石律呂畧刻渾儀咸令  
辯因時制宜皆合軌度多依古禮性彊記默識能斷大  
事凡所創制處之不疑加驃騎大將軍開府儀同三司  
累遷尚書令及六官建為師氏中大夫明帝即位遷小  
宗伯進位大將軍帝嘗與諸公幸其第儒者榮之出為

宜州刺史以患不之部薨謚曰獻配食太祖廟庭子慎嗣位復州刺史慎弟詮性趨捷善騎射位儀同三司隋開皇初以辯前代名德追封沈國公初文帝欲行周官命蘇綽專掌其事未幾而綽卒乃令辯成之於是依周禮建六官革漢魏之法以魏恭帝三年始命行之六卿之外置太師太傅太保各一人是曰三孤時未建東宮其太子官員改創未畢尋又改典命為大司禮置中大夫自茲厥後世有損益武成元年增御正四人位上大

夫保定四年改宗伯為納言禮部為司宗大司禮為禮  
部大司樂為樂部五年左右武伯各置大夫一人以建  
德元年改置宿衛官員二年省六府諸司中大夫以下  
官府置四司以下大夫為官之長士貳之是歲又增改  
東宮官員三年初置太子諫議大夫員四人文學十人  
皇弟皇子友員各二人學士六人四年又改置宿衛官  
員其司武司衛之類皆後所增改太子正宮尹之屬亦  
後所創置而典章散滅弗可復知宣帝嗣位事不師古

官員班品隨意變革至如初置四輔官及六府諸司復置中大夫並御正內史增置上大夫等則載於外史餘則朝出夕改莫能詳錄於時雖行周禮其內外衆職又兼用秦漢等官今略舉其名號及命數附之於左其紀傳內更有餘官而此不載者亦史之闕文也

柱國大將軍建德四年增置上柱國上將軍也

右正九命

驃騎大將軍開府儀同三司建德四年改為開府儀同大將軍仍增上開府儀同大將軍車騎大將軍儀同三

司建德四年改為儀同大將軍仍增上儀同雍州牧右正九命

驃騎大將軍右光祿大夫車騎將軍左光祿大夫戶三萬以上州刺史右正八命

征東征西征南征北中軍鎮軍撫軍等將軍左右金紫光祿大夫大都督戶二萬以上州刺史京兆尹右八命

平東平西平南平北前右左後等將軍左右銀青光祿大夫帥都督柱國大將軍府長史司馬司錄戶一萬以

上州刺史右正七命

冠軍輔國等將軍太中中散等大夫都督戶五千以上

州刺史戶一萬五千以上郡守右七命

鎮遠建忠等將軍諫議諮議等大夫別將開府長史司

馬司錄戶不滿五千以下州刺史一萬以上郡守大呼

藥右正六命

中堅寧朔等將軍左右中郎將儀同府正八命州長史

司馬司錄戶五千以上郡守小呼藥右六命

寧遠揚烈等將軍左右員外常侍統軍驃騎車騎將軍  
府八命州長史司馬司錄柱國大將軍府中郎掾屬戶  
一千以上郡守長安萬年縣令右正五命

伏波輕車等將軍奉車奉騎等都尉四征中鎮撫將軍  
府正七命州長史司馬司錄開府府中郎掾屬戶不滿  
一千以下郡守戶七千以上縣令正八命州呼藥右五

宣威明威等將軍虎賁冗從等給事儀同府中郎掾屬  
柱國大將軍府列曹參軍四平前右左後將軍府七命

州長史司馬司錄正八命州別駕戶四千以上縣令八  
命州呼藥右正四命

襄威厲威等將軍給事中奉朝請軍主開府列曹參軍  
冠軍輔國將軍府正六命州長史司馬司錄正七命州  
別駕正八命州中從事七命郡丞戶二千以上縣令正  
七命州呼藥右四命

威烈討寇等將軍左右員外侍郎幢主儀同府正八命  
州列曹參軍柱國大將軍府參軍鎮遠建忠中堅寧朔

將軍府長史司馬司錄正六命州別駕正七命州中從事正六命郡丞戶五百以上縣令七命州呼藥右正三命

蕩寇蕩難等將軍武騎常侍侍郎開府參軍驃騎車騎

將軍府八命州列曹參軍寧遠揚烈伏波輕車將軍府長史正六命州中從事六命郡丞戶不滿五百以下縣令戍主正六命州呼藥右三命

殄寇殄難等將軍彊弩積弩等司馬四征中鎮撫將軍府正七命州列曹參軍正五命郡丞右正二命

掃寇掃難等將軍武騎武威等司馬四平前右左後將軍府七命州列曹參軍五命郡丞副右二命

曠野橫野等將軍殿中員外二司馬冠軍輔國將軍府正六命州列曹參軍右正一命

虎威虎牙等將軍淮海山林二都尉鎮遠建忠中堅寧朔寧遠揚烈伏波輕車將軍府列曹參軍右一命

周制封郡縣五等爵者皆加開國授柱國大將軍開府儀同者並加使持節大都督其開府又加驃騎大將軍

侍中其儀同又加車騎大將軍散騎常侍其授總管刺  
史則加使持節諸軍事以此為常大象元年詔總管刺  
史及行兵者加持節餘悉罷之辯所制定之後又有改  
革今粗附之云辯弟光字景仁性溫謹博覽羣書精於  
三禮善陰陽解鍾律又好玄言魏孝昌初釋褐司空府  
參軍事及孝武西遷光於山東立義遙授晉州刺史大  
統六年攜家西入除丞相府記室參軍賜爵范陽縣伯  
俄拜行臺郎中專掌書記改封安息縣伯歷位京兆郡

守侍中開府儀同三司匠師中大夫進爵燕郡公虞州  
刺史行陝州總管府長史卒官武帝少嘗受業於光故  
賄贈有加恒典贈少傅謚曰簡光性崇佛道至誠信敬  
嘗從文帝狩於檀臺山時獵圍既合帝遙指山上謂羣  
公曰公等有所見不咸曰無所見光獨曰見一桑門帝  
曰是也即解圍而還令光於桑門立處造浮圖掘基一  
丈得瓦鉢錫杖各一帝稱歎因立寺焉及為京兆而郡  
舍先是數有妖怪前後郡將無敢居者光曰吉凶由人

妖不妄作遂入居之未幾光所乘馬忽升聽事登牀南  
首而立食器無故自破光並不以介懷其精誠守正如  
此注道德經章句行於世子賁嗣賁列在隋史

韋叔裕字孝寬京兆杜陵人也少以字行世為三輔著  
姓祖直善魏馮翊扶風二郡守父旭武威郡守建義初  
為大行臺右丞加輔國將軍雍州大中正永安二年拜  
右將軍南幽州刺史時氐賊數為抄竊旭隨機招撫並  
即歸附尋卒官贈司空冀州刺史謚曰文惠孝寬沈敏

和正涉獵經史年十五便有壯志善籌算識者稱之屬  
蕭寶夤作亂關右乃詣闕請為軍前驅朝廷嘉之即拜  
統軍隨馮翊公長孫承業西征每戰有功拜國子博士  
行華山郡事屬侍中楊侃為大都督出鎮潼關引孝寬  
為司馬侃奇其才以女妻之永安中授宣威將軍給事  
中尋賜爵北山縣男普泰中以都督從荊州刺史源子  
恭鎮穰城以功除淅陽郡守時獨孤信為新野郡守同  
隸荊州與孝寬情好款密政術俱美荊州部吏民號為

連璧孝武初以都督鎮彭城文帝自原州赴雍州命孝  
寬隨軍及克潼關即授弘農郡守從擒竇泰兼左丞節  
度宜陽兵馬事仍與獨孤信入洛為陽城郡守復與宇  
文貴怡峯應接潁州義從破東魏將任祥堯雄於潁川  
孝寬又進平樂口下豫州獲刺史馮邕又從戰於河橋  
時大軍不利邊境騷然乃令孝寬以本將軍行宜陽郡  
事尋遷南兗州刺史是歲東魏將軍段琛據宜陽號驍  
猛遣其揚州刺史牛道恒扇誘邊民孝寬深患之乃遣

謀人訪獲道恒手迹令善學書者偽作道恒與孝寬書論歸款之意又為落燼燒迹若火下書者令謀人遺之於琛營琛得書果疑道恒其所欲經略皆不見用孝寬知其離阻因出奇兵掩襲禽道恒及琛等崎澗遂清大統五年進爵為侯八年轉晉州刺史尋移鎮玉壁兼攝南汾州事先是山胡負險屢為劫盜孝寬示以威信州境肅然進授大都督十二年齊神武傾山東之衆志圖西入以玉壁衝要先命攻之連營數十里至於城下乃

於城南起土山欲乘之以入當其山處城上先有兩高  
樓孝寬更縛木接之令極高峻多積戰具以禦之齊神  
武使謂城中曰縱爾縛樓至天我會穿城取爾遂於城  
南鑿地道又於城北起土山攻具晝夜不息孝寬復掘  
長塹要其地道仍簡戰士屯塹城外每穿至塹戰士即  
擒殺之又於塹外積柴貯火敵人有在地道內者便下  
柴火以皮排吹之火氣一衝咸即灼爛城外又造攻車  
車之所及莫不摧毀雖有排楯莫之能抗孝寬乃縫布

為縵隨其所向則張設之布懸於空中其車竟不能壞  
城外又縛松於竿灌油加火規以燒布并欲焚樓孝寬  
復作長鐵鈎利其鋒刃火竿既來以鈎遙割之松麻俱  
落外又於城四面穿地作二十一道分為四路於其中  
各施梁柱作訖以油灌柱放火燒之柱折城並崩壞孝  
寬又隨崩處豎木柵以扞之敵不得入城外盡其攻擊  
之術孝寬咸拒破之神武無如之何乃遣倉曹參軍祖  
孝徵謂曰未聞救兵何不降也孝寬報云我城池嚴固

兵食有餘攻者自勞守者常逸豈有旬朔之間已須救援適憂爾衆有不反之危韋孝寬關西男子必不為降將軍也俄而孝徵復來謂城中人曰韋城主受彼榮祿或復可爾自外軍士何事相隨入湯火中邪乃射慕格於城中云能斬城主降者拜太尉封開國郡公邑萬戶賞帛萬疋孝寬手題書背反射城外云若有斬高歡者一依此賞孝寬弟子遷先在山東又鎬至城下臨以白刃云若不早降便行大戮孝寬慷慨激揚畧無顧意士

卒莫不感勵人有死難之心齊神武苦戰六旬傷及病死者十四五智力俱困因而發疾其夜燒營而遁因此忿恚發病而殂魏文帝嘉孝寬功令殿中尚書長孫紹遠左丞王悅至玉壁勞問授驃騎大將軍開府儀同三司進爵建忠郡公廢帝二年為雍州刺史先是路側一里置一土堠經雨頽毀每須修之自孝寬臨州乃勒部內當土堠處植槐樹代之既免修復行旅又得庇廕文帝後見怪問知之曰豈得一州獨爾當令天下同之於

是令諸州夾道一里種一樹十里種三樹百里種五樹  
焉魏恭帝元年以大將軍與燕公于謹伐江陵平之以  
功封穰縣公還拜尚書右僕射賜姓宇文氏三年文帝  
北巡命孝寬還鎮玉壁孝閔帝踐阼拜小司徒明帝初  
參麟趾殿學士考校圖籍保定初以孝寬立勲玉壁遂  
於玉壁置勲州仍授勲州刺史齊人遣使至玉壁求通  
互市晉公護以其相持日久絕無使命一旦忽來求交  
易疑別有故又以皇姑皇世母先沒在彼因其請和之

際或可致之遂令司門下大夫尹公正至玉璧與孝寬詳議孝寬乃於郊盛設供帳令公正接對使人兼論皇家親屬在東之意於是使者忻然辭色甚悅時又有汾州胡抄得關東人孝寬復放東還并致書一牘具陳國家欲敦隣好遂以禮送皇姑及護母等孝寬善於撫御能得人心所遣間諜入齊者皆為盡力亦有齊人得孝寬金貨遙通書疏故齊人動靜朝廷皆得先知時有主帥許盆孝寬委以心膂令守一城盆乃以城東入孝寬

怒遣諜取之俄而斬首而還其能致物情如此汾州之  
北離石以南悉是生胡抄掠居民阻斷河路孝寬深患  
之而地入於齊無方誅翦欲當其要處置一大城乃於  
河西徵役徒十萬甲士百人遣開府姚岳監築之岳色  
懼以兵少為難孝寬曰計成此城十日即畢既去晉州  
四百餘里一日創手二日偽境始知設令晉州徵兵二  
日方集謀議之間自稽三日計其軍行二日不到我之  
城隍足得辨矣乃令築之齊人果至南首疑有大軍乃

停留不進其夜又令汾水以南傍介山稷山諸村所在縱火齊人謂是軍營遂收兵自固版築克就卒如孝寬言四年進位柱國時晉公護將東討孝寬遣長史辛道憲啓陳不可護不從既而大軍果不利後孔城遂陷宜陽被圍孝寬乃謂其將帥曰宜陽一城之地未能損益然兩國爭之勞師數載彼多君子寧乏謀猷若棄崤東來圖汾北我之疆界必見侵擾今宜於華谷及長秋速築城以杜賊志脫其先我圖之實難於是畫地形具陳

其狀晉公護令長史叱羅協謂使人曰韋公子孫雖多  
數不滿百汾北築城遣誰固守事遂不行天和五年進  
爵鄖國公增邑通前萬戶是歲齊人解宜陽之圍經畧  
汾北築城守之其丞相斛律明月率數十騎至汾東請  
與孝寬相見明月云宜陽小城久勞戰爭今既入彼欲  
於汾北取償幸勿怪也孝寬答曰宜陽彼之要衝汾北  
我之所棄我棄彼圖取償安在且君輔翼幼主位重望  
隆理宜調陰陽撫百姓焉用極武窮兵結怨連禍且滄

瀛大水千里無煙復欲使汾晉之間橫尸暴骨苟貪尋  
常之地塗炭疲弊之民竊為君不取也時孝寬參軍曲  
巖頗知卜筮謂孝寬曰來年東朝必大相殺戮孝寬因  
令巖作謠歌曰百升飛上天明月照長安百升斛也又  
言高山不摧自崩槲木不扶自豎令謀人多齎此文遺  
之於鄴祖孝徵既聞更潤色之明月竟以此誅建德之  
後武帝志在平齊孝寬乃上疏陳平齊三策其第一曰  
臣在邊積年頗見間隙不因際會難以成功是以往歲

出軍頗有勞費功績不立由失機會何者長淮之南舊  
為沃土陳氏以破亡餘燼猶能以一舉平之齊人歷年  
赴救喪敗而反內離外叛計盡力窮傳不云乎讐有釁  
焉不可失也今大軍若出軼關方軌而進兼與陳氏共  
為掎角并令廣州義旅出自三鷗又募山南驍銳沿河  
而下復遣北山稽胡絕其并晉之路凡此諸軍仍令各  
募關河之外勁勇之士厚其爵賞使為前驅岳動山移  
雷駭電激百道俱進並趨虜庭必當望旗奔潰所向摧

殄一戎大定實在此機其第二策曰若國家更為後圖  
未即大舉宜與陳人分其兵勢三鷗以北萬春以南廣  
事屯田預為積貯募其驍悍立為部伍彼既東南有敵  
戎馬相持我出奇兵破其疆場彼若興師赴援我則堅  
壁清野待其去遠還復出師常以邊外之軍引其腹心  
之衆我無宿春之費彼有奔命之勞一二年中必自離  
叛且齊氏昏暴政出多門鬻獄賣官唯利是視荒淫酒  
色忌害忠良闔境熬然不勝其弊以此而觀覆亡可待

然後乘間電掃事等摧枯其第三策曰竊以大周土宇  
跨據關河蓄席卷之威持建瓴之勢太祖受天明命與  
物更新是以二紀之中大攻克舉南清江漢西龕巴蜀  
塞表無虞河右底定唯彼趙魏獨為榛梗者正以有事  
三方未遑東畧遂使漳滏游魂更存餘晷昔勾踐平吳  
尚期十載武王取亂猶煩再舉今若更存遵養且復相  
時臣謂宜還崇隣好申其盟約安民和衆通商惠工蓄  
銳養威觀釁而動斯則長策遠馭坐自兼并也書奏武

帝遣小司寇淮南公元衛開府伊婁謙等重幣聘齊爾後遂大舉再駕而定山東卒如孝寬之策孝寬每以年迫懸車屢請致仕帝以海內未平優詔弗許至是復稱疾乞骸骨帝曰往已面申本懷何煩重請也五年帝東伐過幸玉璧觀禦敵之所深歎美之移時乃去孝寬自以習練齊人虛實請為先驅帝以玉璧要衝非孝寬無以鎮之乃不許及趙王招率兵出稽胡與大軍掎角乃勑孝寬為行軍總管圍守華谷以應接之孝寬克其四

城武帝平晉州復令孝寬還舊鎮及帝凱旋復幸玉壁  
從容謂孝寬曰世稱老人多智善為軍謀然朕唯共少  
年一舉平賊公以為如何孝寬對曰臣今衰耄唯有誠  
心而已然昔在少壯亦曾輸力先朝已定關右帝大笑  
曰實如公言乃詔孝寬隨駕還京拜大司空出為延州  
總管進位上柱國大象元年除徐兗等十一州十五鎮  
諸軍事徐州總管又為行軍元帥徇地淮南乃分遣杞  
公宇文亮攻黃城鄜公梁士彥攻廣陵孝寬率衆攻壽

陽並拔之初孝寬到淮南所在皆密送款然彼五門尤  
為險要陳人若開塘放水即津濟路絕孝寬遽令分兵  
據守之陳刺史吳文立果遣決堰已無及於是陳人退  
走江北悉平軍還至豫州宇文亮舉兵文立以數百騎  
襲孝寬營時亮國官茹寬密白其狀孝寬有備亮不得  
入乃遁走孝寬追獲之詔以平淮南之功別封一子滑  
國公及宣帝崩隋文帝輔政時尉遲迥先為相州總管  
詔孝寬代之又以小司徒叱列長文為相州刺史先令

赴鄴孝寬續進至朝歌迴遣其都督賀蘭貴齋書候孝  
寬孝寬留貴與語以察之疑其有變遂稱疾徐行又使  
人至相州求醫藥密以伺之既到湯陰值長文奔還孝  
寬兄子魏郡守藝又棄郡南走孝寬審知其狀乃馳歸  
所經橋道皆令毀撤驛馬悉擁以自備又勒驛將曰蜀  
公將至可多備餚酒及芻粟以待之迴果遣儀同梁子  
康將數百騎追孝寬驛司供設豐厚所經之處皆輒停  
留由是不及時或勸孝寬以為洛京虛弱素無守備河

陽鎮防悉是關東鮮卑迥若先往據之則為禍不小乃入保河陽河陽城內舊有鮮卑八百家並在鄴見孝寬輕來謀欲應迥孝寬知之遂密造東京官司詐稱遣行分人詣洛受賜既至洛陽並留不遣因此離解其謀不成六月詔發關中兵以孝寬為元帥東伐七月軍次河陽迥所署儀同薛公禮圍逼懷州孝寬遣兵擊破之進次懷縣永橋城之東南其城既在要衝雉堞牢固迥已遣兵據之諸將士以此城當路請先攻取孝寬曰城

小而固若攻而不拔損我兵威今破其大軍此亦何能為也於是引軍次于武陟大破迥子惇惇輕騎奔鄴軍進次於鄴西門豹祠之南迥自出戰又破之迥窮迫自殺兵士在小城中盡阬之游豫園諸有未服者皆隨機討之關東悉平十月凱還京師十一月薨時年七十二贈太傅十二州諸軍事雍州牧謚曰襄孝寬在邊多載屢抗彊敵所有經畧布置之功人莫之解見其成事方乃驚服雖在軍中篤意文史政事之餘每自披閱末年

患眼猶令學士讀而聽之又早喪父母事兄嫂甚謹所得俸祿不入私房親族有孤遺者必加賑贍朝野以此稱焉長子諶年已十歲魏文帝欲以女妻之孝寬辭以兄子世康年長帝嘉之遂以妻世康孝寬有六子總壽霽津知名總字善會聰敏好學位驃騎大將軍開府儀同三司納言京兆尹武帝常戲總曰卿師尹帝鄉故當不以富貴威福鄉里邪總乃正色對曰陛下擢臣非分竊謂已鑒愚誠今奉嚴旨便似未照丹赤豈可久忝此

職用疑聖慮請解印綬以避賢能帝大笑曰前言戲之耳從武帝東征總每率麾下先驅陷陣遂於并州戰沒時年二十九贈上大將軍追封河南郡公諡曰貞六年重贈柱國五州刺史子國成嗣後襲孝寬爵鄖國公隋文帝追錄孝寬舊勲開皇初詔國成食封三千戶收其租稅壽字世齡以貴公子早有令譽位京兆尹武帝親征齊委以後事以父軍功賜爵永安縣侯隋文帝為丞相以其父平尉遲迴拜壽儀同三司進封滑國公文帝

受禪歷毛恒二州刺史頗有能名以疾徵還卒于家謚曰定仁壽中文帝為晉王廣納其女為妃其子保繼嗣壽弟霽位太常少卿安邑縣伯霽弟津位內史侍郎戶部侍郎判尚書事孝寬兄夏字敬遠志尚夷簡澹於榮利弱冠召拜雍州治中從事非其好也遂謝病去職前後十見徵辟皆不應命屬文帝經綸王業側席求賢聞夏養高不仕虛心敬悅遣使辟之備加禮命雖情諭甚至而竟不能屈文帝彌重之亦不之奪也所居之宅枕

帶林泉僕對玩琴書蕭然自逸時人號為居士焉至有  
慕其閒素者或載酒從之僕亦為之盡歡接對忘倦明  
帝即位禮敬逾厚乃為詩以貽之曰六爻貞遯世三辰  
光少微潁陽讓逾遠滄州云不歸香動秋蘭佩風飄蓮  
葉衣坐石窺仙洞乘槎下釣磯嶺松千仞直巖泉百丈  
飛聊登平樂觀遙望首陽薇詎能同四隱來參予萬機  
僕答帝詩願時朝謁帝大悅勅有司日給河東酒一斗  
號之曰逍遙公時晉公護執政廣營第宅嘗召僕至宅

訪以政事屢仰觀其堂徐而歎曰酣酒嗜音峻宇雕牆  
有一于此未或不亡謾不悅有識者以為知言陳遣其  
尚書周弘正來聘素聞夐名請與相見朝廷許之弘正  
乃造夐談謔盡日恨相遇之晚後請夐至賓館夐不時  
赴弘正乃贈詩曰德星猶未動真車詎肯來其為當時  
所欽挹如此武帝嘗與夐夜宴大賜之縑帛令侍臣數  
人負以送出夐惟取一疋示承恩旨而已帝以此益重  
之孝寬為延州總管時夐至州與孝寬相見及還孝寬

送以所乘馬及轡勒與夏寃以其華飾心弗欲之笑謂  
孝寬曰昔人不棄遺簪墜屨者惡與之同出不與之同  
歸吾之操行雖不逮前烈然捨舊錄新亦非吾志也於  
是乃乘舊馬以歸武帝又以佛道儒三教不同詔夏辯  
其優劣寃以三教雖殊同歸於善其迹似有深淺其理  
致如無等級乃著三教序奏之帝覽而稱善時宣帝在  
東宮亦遺寃書并令以帝所乘馬迎之間立身之道寃  
對曰傳不云乎儉為德之共侈為惡之大欲不可縱志

不可滿並聖人之訓也願殿下察之夐子瓘行隨州刺史因疾歿故孝寬子總復於并州戰歿一日之中凶問俱至家人相對悲慟而夐神色自若謂之曰死生命也去來常事亦何足悲援琴撫之如舊夐又雅好名義虛襟善誘雖耕夫豎子有一介可稱者皆接引之特與族人處元及安定梁曠為放逸之友少愛文史留情著述手自抄錄數十萬言晚年虛靜唯以體道會真為務舊所制述咸削其藁故文筆多不載建德中夐以年老預

戒其子等曰昔士安以蘧篠束體王孫以布囊繞尸二  
賢高達非庸才能繼吾死之日可斂以舊衣勿更新造  
使棺足周尸牛車載柩墳高四尺墳深一丈其餘煩雜  
悉無用也朝晡奠食於事彌煩吾不能頓絕汝輩之情  
可朔望一奠而已但薦蔬食勿設牲牢親友欲以物弔  
祭者並不得為受吾恐臨終恍惚故以此言預戒汝輩  
瞑目之日勿違吾言也宣政元年二月卒於家時年七  
十七諸子皆為方伯柱國武帝遣使弔祭賙贈有加其

喪制葬禮諸子並遵其遺戒子世康洗瓘藝沖並列在隋史

韋瑱字世珍京兆杜陵人也世為三輔著姓曾祖惠度  
姚泓尚書郎隨劉義真過江仕宋為順陽太守行南雍  
州事後於襄陽歸魏拜中書侍郎贈洛州刺史祖千雄  
畧陽郡守父英代郡守贈兗州刺史瑱幼聰敏有夙成  
之量起家太尉府法曹參軍累遷諫議大夫文帝為丞  
相封長安縣男轉行臺左丞遷南郢州刺史復令為行

臺左丞瑱明察有幹局再居左轄時論榮之從復弘農  
戰沙苑加衛大將軍左光祿大夫從戰河橋進爵為子  
大統八年齊神武侵汾絳瑱從文帝禦之軍還以本官  
鎮蒲津關帶中潭城主歷鴻臚卿以望族兼領鄉兵加  
帥都督進散騎常侍魏恭帝三年賜姓宇文氏三年除  
瓜州刺史州通西域蕃夷往來前後刺史多受賂遺胡  
寇犯邊又莫能禦瑱雅性清儉兼有武畧蕃夷贈遺一  
無所受胡人畏服不敢為寇公私安靜夷夏懷之孝閔

帝踐阼進爵平齊縣伯秩滿還京吏民戀慕老幼追送  
留連十數日方得出境明帝嘉之授侍中驃騎大將軍  
開府儀同三司卒贈歧宜二州刺史謚曰惠又追封為  
公詔其子峻襲峻位至車騎大將軍儀同三司峻子德  
政隋大業中給事郎峻弟師隋史有傳

柳虯字仲蟠河東解人也五世祖恭仕後趙為河東郡  
守後以秦趙喪亂率民南徙居汝颍間遂仕江表祖緝  
同州別駕宋安郡守父僧習善隸書敏於當世與豫州

刺史裴叔業據州歸魏歷北地潁川二郡守揚州大中  
正蚪年十三便專精好學時貴游子弟就學者並車服  
華盛唯蚪不修容飾徧受五經畧通人義兼涉子史雅  
好屬文舉秀才兗州刺史馮雋引蚪為府主簿既而樊  
子鵠為吏部尚書其兄義為揚州刺史乃以蚪為揚州  
從事加鎮遠將軍非其好也棄官還洛陽屬天下喪亂  
乃退耕於陽城有終焉之志大統三年馮翊王元季海  
領軍獨孤信鎮洛陽於時舊京荒廢人物罕存唯有蚪

在陽城裴諫在潁川信等乃俱徵之以蚪為行臺郎中  
諫為北府屬並掌文翰時人為之語曰北府裴諫南府  
柳蚪時軍旅務殷蚪勵精從事或通夜不寢季海常云  
柳郎中判事我不復重看四年入朝文帝欲官之蚪辭  
母老乞侍醫藥文帝許焉又為獨孤信開府從事中郎  
信出鎮隴右因為秦州刺史以蚪為二府司馬雖處元  
僚不綜府事唯在信左右談論而已因使見文帝被留  
為丞相府記室追論歸朝功封美陽縣男蚪以史官密

書善惡未足懲勸乃上疏言古者人君立史官非但記事而已蓋所為鑒誠也故動則左史書之言則右史書之彰善瘅惡以樹風聲故南史抗節表崔杼之罪董狐書法明趙盾之愆是知執筆於朝其來久矣而漢魏已還密為記注徒聞後世無益當時豈所謂將順其美匡救其惡者且著述之人密書縱能直筆人莫知之何止橫生物議亦自異端互起故班固致受金之名陳壽有求米之論著漢魏者非一氏造晉史者至數家後代紛

紜莫知準的伏唯陛下則天稽古勞心庶政開誹謗之路納忠讜之言請自今諸史官記事者皆當朝顯言其狀然後付之史閣庶令是非明著得失無隱使聞善者日修有過者知懼事遂施行十四年除祕書丞領著作舊丞不參史事自蚪為丞始令監掌焉遷中書侍郎修起居注仍領丞事時人論文體有古今之異蚪以為時有古今非文有古今乃為文質論文多不載廢帝初遷祕書監加車騎大將軍儀同三司蚪脫畧人間不事小

節弊衣蔬食未嘗改操人或譏之蚪曰衣不過適體食  
不過充饑孜孜營求徒勞思慮耳恭帝元年卒年五十  
四贈兗州刺史謚曰孝有文章數十篇行於世蚪弟檜  
為魏興華陽郡守死於王事列在忠義傳檜弟鷟好學  
善屬文卒於魏臨淮王記室參軍事子帶韋字孝孫深  
沈有度量少好學身長八尺三寸美風儀善占對文帝  
辟為參軍事侯景作亂江南文帝令帶韋使江郢二州  
與梁邵陵南平二王通好行至安州遇段寶等反帶韋

乃矯為文帝書以安之並即降附及見邵陵具申文帝  
意邵陵遣使隨帶韋報命以奉使稱旨授輔國將軍中  
散大夫後達奚武經畧漢川以帶韋為行臺左丞從軍  
南討時梁宜豐侯蕭脩守南鄭武攻之未拔乃令帶韋  
入城說脩降之魏廢帝元年出為解縣令加授驃騎將  
軍左光祿大夫轉汾陰令發擿姦伏百姓畏而懷之武  
成元年授武藏下大夫天和二年封康成縣男累遷兵  
部中大夫雖頻改職仍領武藏五年轉武藏中大夫俄

遷驃騎大將軍開府儀同三司凡居劇職十有餘年處  
斷無滯官曹清肅時譙王儉為益州總管漢王贊為益  
州刺史武帝以帶韋為益州總管府長史領益州別駕  
輔弼二王總知軍事及大軍東討徵為前軍總管齊王  
憲府長史齊平以功授上開府儀同大將軍進爵為公  
陳王純鎮并州以帶韋為并州司會并州總管府長史  
卒官謚曰愷子祚嗣少有名譽位宣納上士入隋位司  
勲侍郎驚弟慶字更興幼聰敏有器量博涉羣書不為

章句好飲酒嫋於占對年十三因曝書父僧習試令慶  
於雜賦集中取賦一篇千餘言誦之慶立讀三遍便誦  
之無漏時僧習為潁川郡守地接都畿人多豪右將選  
鄉官皆依貴勢競來請託選用既定僧習謂諸子曰權  
貴請託吾並不用其使欲還皆須有答汝等各以意為  
吾作書慶乃具書草僧習讀歎曰此兒有意氣丈夫理  
當如是即依慶所草以報起家奉朝請慶出後第四叔  
及遭父憂議者不許為服重慶泣曰禮緣人情若於出

後之家更有苴斬之服可奪此以從彼今四叔薨背已  
久情事不追豈容奪禮乖違天性時論不能抑遂以告  
凶終喪既葬乃與諸兄負土成墳孝武將西遷慶以散  
騎侍郎馳傳入關慶至高平見文帝共論時事文帝即  
請奉迎輿駕仍令慶先還復命時賀拔勝在荊州帝屏  
左右謂慶曰朕欲往荊州何如慶曰關中金城千里天  
下之彊國也荊州地無要害寧足以固鴻基帝納之及  
帝西遷慶以母老不從獨孤信之鎮尋陽乃得入關除

相府東閣祭酒大統十年除尚書都兵郎中并領記室時北雍州獻白鹿羣臣欲賀尚書蘇綽謂慶曰近代以來文章華靡逮於江左彌復輕薄洛陽後進祖述未已相公柄人軌物君職典文房宜製此表以革前弊慶操筆立成辭兼文質綽讀而笑曰枳橘猶自可移況才子也尋以本官領雍州別駕廣陵王欣魏之懿親其甥孟氏屢為兇橫或有告其盜牛慶捕得實趣令就禁孟氏殊無懼容乃謂慶曰若加以桎梏後獨何以脫之欣亦

遣使辯其無罪孟氏由此益驕慶乃大集僚吏盛言孟氏倚權侵虐之狀言畢令笞殺之此後貴戚斂手有賈人持金二十斤詣京師寄人居止每欲出行常自執管鑰無何緘閉不異而並失之謂主人所竊郡縣訊問主人因自誣服慶疑之乃召賈人曰卿鑰常置何處對曰恒自帶之慶曰頗與人同宿乎曰無與同飲乎曰日者曾與一沙門再度酣宴醉而晝寢慶曰沙門乃真盜耳即遣捕沙門乃懷金逃匿後捕得盡獲所失金十二年

改三十六曹為十二部以慶為計部郎中別駕如故又有胡家被劫郡縣按察莫知賊所隣近被囚者甚多慶以賊是烏合可以詐求之乃作匿名書多榜官門曰我等共劫胡家徒侶混雜終恐泄露令欲首伏懼不免誅若聽先首免罪便欲來告慶乃復施免罪之牒居二日廣陵王欣家奴面縛自告牒下因此盡獲黨與慶之守正明察皆此類也每歎曰昔于公斷獄無私閑高門以待封儻斯言有驗吾其庶幾乎封清河縣男除尚書左

丞攝計部文帝嘗怒安定國臣王茂將殺之而非其罪  
朝臣咸知而莫敢諫慶乃進爭之文帝愈怒曰卿若明  
其無罪亦須坐之乃執慶於前慶辭氣不撓抗聲曰竊  
聞君有不達者為不明臣有不才者為不忠慶謹竭愚  
誠實不敢愛死但懼公為不明之君耳文帝乃悟而赦  
茂已不及矣文帝默然明日謂慶曰吾不用卿言遂令  
王茂冤死可賜茂家錢帛以旌吾過尋進爵為子慶威  
儀端肅樞機明辯文帝每發號令常使慶宣之天性抗

直無所回避文帝亦以此深委仗焉魏恭帝初進位驃  
騎大將軍開府儀同三司尚書右僕射轉左僕射領著作  
六官建拜司會中大夫孝閔帝踐阼賜姓宇文氏進  
爵平齊縣公晉公護初執政欲引為腹心慶辭之頗忤  
旨又與楊寬有隙及寬參知政事慶遂見疎忌出為萬  
州刺史明帝尋悟留為雍州別駕領京兆尹武成二年  
除宜州刺史慶自為郎迄為司會府倉儲並其職也及  
在宜陽寬為小家宰乃因慶故吏求其罪失案驗積六

十餘日吏或有死於獄者終無所言惟得來錦數疋時人服其廉慎又入為司會先是慶兄檜為魏興郡守為賊黃衆寶所害檜子三人皆幼弱慶撫養甚篤後衆寶歸朝朝廷待以優禮居數年檜次子雄亮白日手刃衆寶於長安城中晉公護聞而大怒執慶諸子姪皆囚之讓慶擅殺人對曰慶聞父母之讐不同天兄弟之讐不同國明公以孝臨天下何乃責於此乎護愈怒慶辭色無屈竟以俱免卒贈鄜綏丹三州刺史謚曰景子機嗣

機列在隋史機弟弘字匡道少聰明工草隸博涉羣書辭采雅贍與弘農楊素為莫逆友解巾中外府記室建德初除內史上士歷小官尹御正上士陳遣王偃人來聘武帝令弘勞之偃人謂弘曰來日至藍田正逢滋水暴長所齎國信溺而從流今所進假之從吏請勒下流人見為尋此物弘曰昔淳于之獻空籠前史稱以為美足下假物而進詎是陳君命乎偃人慙不能對武帝聞而嘉之盡以偃人所進物賜弘仍令報聘占對敏捷見

稱於時後卒於御正下大夫贈晉州刺史楊素誄之曰  
山陽王弼風流長逝潁川荀粲零落無時脩竹夾池永  
絕梁園之賦長楊映沼無復洛川之文其為士友所痛  
惜如此有文集行於世弘弟旦弟肅並附機傳於後  
寇雋字祖雋上谷昌平人也祖讚魏南兗州刺史父臻  
弘農太守讚自有傳雋性寬雅幼有識量好學性廉恕  
不以財利為心家人曾賣物與人而剩得絹一疋雋於  
後知之乃曰惡木之陰不可暫息盜泉之水無容誤飲

得財失行吾所不取遂訪主還之以選為魏孝文挽郎  
除奉朝請大乘賊起燕趙擾亂雋參護軍事東討以功  
授員外散騎侍郎累遷司空府主簿時靈太后臨朝減  
食祿官十分之一造永寧佛寺令雋典之資費鉅萬主  
吏不能欺隱寺成又極壯麗靈太后嘉之除左軍將軍  
孝昌中朝論以國用不足乃置鹽池都將秩比上郡前  
後居職者多有侵隱乃以雋為之仍主簿永安初華州  
人史底與司徒楊椿訟田長史以椿勢貴皆言椿直欲

以田給椿雋曰史底窮民楊公橫奪其地若欲損不足  
以給有餘見使雷同未敢聞命遂以地還史底孝莊帝  
後知之嘉雋守正不撓拜大司馬其附椿者咸責焉二  
年出為梁州刺史民俗荒獘多為盜賊雋乃令郡縣為  
立庠序勸其耕桑敦以禮讓數年之中風俗頓革梁遣  
其將曹琰之鎮魏興繼日版築琰之屢擾疆場邊人患  
之雋遣長史杜林道攻克其城并禽琰之琰之即梁大  
將景宗之季弟也於是梁人懼焉屬魏室多故州又辟

遠梁人知無外援遂大兵頓魏興志圖攻取雋撫厲將士人思効命梁人知其得衆心也弗之敢逼雋在州清苦不治產業秩滿其子等並徒步而還吏民送雋留連於道久之乃得出界大統三年東魏授雋洛州刺史雋因此乃謀歸闕五年將家及親屬四百餘口入關拜祕書監時軍國草創墳典散逸雋始選置令史抄集經籍四部羣書稍得周備加鎮東將軍封西安縣男十七年加散騎常侍雋以年老乞骸骨不許遂稱疾篤不復朝

觀魏恭帝二年賜姓若口引氏孝閔帝踐阼進爵為子  
武成元年進驃騎開府儀同三司雋年齒雖高而氣識  
未衰教授子孫必先典禮明帝尚儒重德特欽賞之數  
加恩賜思與相見雋不得已乃入朝明帝與同席而坐  
因顧訪洛陽故事雋身長八尺鬚鬢皓然容止端詳音  
韻清朗帝與之談論不覺屢為前膝及雋辭還帝親執  
其手曰公年德俱尊朕所欽向乞言之事所望於公宜  
數相見以慰虛想以御輿令於帝前乘出顧謂左右曰

如此之事唯積善可以致之何止見重於今亦將傳之  
萬古時人咸以為榮保定三年卒年八十二武帝歎惜  
之贈本官加冀定瀛三州諸軍事冀州刺史謚曰元雋  
篤於仁義期功之中有孤幼者衣食豐約並與之同少  
為司徒崔光所知光命其子勵與雋交結雋每造光清  
談移日小宗伯盧辯以雋業行俱崇待以師友之禮每  
有閑暇輒詣雋亦讌語彌日常謂人曰不見西安君煩  
憂不遣其為通人所敬重如此子奉位至儀同大將軍

順陽郡守洵州刺史昌國縣公奉弟顯少好學最知名  
居喪哀毀位儀同大將軍掌朝布憲為典祀下大夫小  
納言濩澤郡公

長孫儉本名慶明其先代人魏太尉北平王嵩之五世  
孫也曾祖地汾安東將軍臨川公祖酌恒州刺史父威  
員外散騎侍郎早卒儉少方正有操行狀貌魁偉神彩  
嚴肅雖在私室終日儼然性不妄交非其同志雖貴游  
造門亦不與相見太昌中邊方騷動儉初假夏州防城

大都督從爾朱天光破宿勤明達等以功賜爵索盧侯文帝臨夏州以儉為錄事參軍深敬器之及賀拔岳被害文帝赴平涼凡有經綸謀策儉皆參預從平侯莫陳悅留儉為秦州長史防城大都督委以後事別封信都縣伯渭州刺史可朱渾元奔東魏後河渭間人情離阻刺史李弼令儉權鎮渭州儉將十餘萬騎冒難赴之復隨機安撫羌胡悅服轉夏州刺史甚得人和時西夏州仍未內屬而東魏遣許和為刺史儉以信義招之和乃

舉州歸附即以儉為西夏州刺史總統三夏州諸軍事時荆襄初附文帝表儉功績尤美宜委東南之任授儉都督三荆等十二州諸軍事荊州刺史東南道行臺僕射所部鄭縣令泉璨為民所訟推案獲實儉即大集僚屬而謂之曰此由刺史教誨不明信不被物是我之愆非泉璨之罪遂於聽事前肉袒自罰捨璨不問於是屬城肅勵莫敢犯法魏文帝璽書勞之文帝又與儉書曰近行路傳公以部內縣令有罪遂自杖三十用肅羣下

聞之嘉歎良久不可言儉清正率下兼懷仁恕有竊盜者原情得實誣而放之荆蠻舊俗少不事長儉殷勤勸導風俗大革務廣耕桑兼習武事故得邊境無虞民安其業吏民表請為儉構清德樓樹碑刻頌朝議許焉吏民又以儉秩滿恐有代至上闕乞留儉朝廷嘉而許之在州遂歷七載徵授大行臺尚書兼相府司馬嘗與羣公侍坐於文帝及退文帝謂左右曰此公閑雅孤每與語嘗肅然畏敬恐有所失他日文帝又謂儉曰名實理

須相稱尚書既志安貧素可改名儉以彰雅操遷尚書  
左僕射加侍中後除東南道行臺僕射大都督十五州  
諸軍事荊州刺史時梁岳陽王蕭詧內附初遣使入朝  
至荊州儉於聽事列軍儀具戎服以賓主禮見使容貌  
魁偉音聲如鐘大為鮮卑語遣人傳譯以答問客惶恐  
不敢仰視日晚儉乃著裙襦紗帽引客宴於別齋因敘  
梁國喪亂朝廷招攜之意發言可觀使人大悅出曰吾  
所不能測也魏廢帝二年授東南道大都督荆襄等三

十三州鎮防諸軍事及梁元帝嗣位於江陵外敦隣睦  
內懷異計儉密啓文帝陳攻取之謀於是徵儉入朝問  
其經畧儉陳其謀文帝深然之乃令還州密為之備尋  
令柱國燕公于謹總戎伐江陵事平以儉元謀賞奴婢  
三百口文帝與儉書曰本圖江陵由公畫計今吳民離  
散事藉招懷南服重鎮非公莫可遂令儉鎮江陵進爵  
昌寧郡公遷大將軍後移鎮荊州授總管荆襄等五十  
二州諸軍事行荊州刺史及孝閔帝初趙貴等將圖晉

公護儉長子僧衍預其謀坐死護乃徵儉拜小冢宰保定四年拜柱國朝議以儉操行清白勲績隆重乃下詔褒美之兼賜以雜綵粟麥以彰其美天和初轉陝州總管七州諸軍事陝州刺史儉舊嘗詣闈奏事時值大雪遂立於雪中待報自旦達暮殊無惰容其奉公謹慤皆此類也以疾還京詔以儉舊居狹隘賜甲第一區後薨於夏州總管臨終遺令斂以時服素車載柩不設儀仗親友贈襚一無所受諸子並奉行之又遺啓明帝請葬

於文帝陵側并以官所賜之宅還官詔皆從之贈本官  
加涼瓜等十州諸軍事涼州刺史追封鄆國公謚曰文  
荊州人儀同趙超等六百九十七人感儉遺愛詣闕請  
為儉立廟樹碑詔許之建德元年詔曰故柱國鄆國公  
儉臨終審正爰吐德音以所居之宅本因上賜制度弘  
麗非諸子所居請以還官更遷他所昔叔敖辭沃壤之  
地蕭何就窮僻之鄉以古方今無慙曩哲言尋加尚弗  
忘于懷而有司未達大體遽以其第外給夫追善金財

先王令典豈得遂其謙挹致乖懲勸今以本宅還其妻  
子俾清風遠播無替聿修次子隆位司令中大夫從長  
湖公元定伐陳沒江南卒隆弟平最知名平列在隋史  
長孫紹遠字士師少名仁代人魏司空上黨王道生玄  
孫也父承業太師錄尚書事前史皆有傳紹遠寬容有  
大度雅好墳籍聰慧過人父承業作牧壽春時紹遠年  
十三承業管記有王碩者文學士也聞紹遠彊記遂白  
承業求驗之承業命試之碩乃試以禮記月令於是紹

遠讀數紙纔一偏誦之若流碩歎服之起家司徒府參  
軍事後以別將討平河東蜀薛封東阿縣伯魏孝武西  
遷紹遠隨承業奔赴以功別封文安縣子大統二年除  
太常卿遷中書令仍襲父爵後例降為公改馮翊郡恭  
帝二年累遷錄尚書事文帝每謂羣公曰長孫公任使  
之處令人無反顧憂漢之蕭寇何足多也且其容止堂  
堂足為當今模楷六官建拜大司樂孝閔踐阼封上黨  
公初紹遠為太常廣召工人創造樂器土木絲竹各得

其宜唯黃鍾不調紹遠每以為意嘗因退朝經韓使君  
佛寺前浮屠三層之上有鳴鐸焉忽聞其音雅合宮調  
因取而配奏方始克諧乃啓明帝曰魏氏來宅秦雍雖  
祖述樂章然黃鍾為君天子之正位往經創造歷稔無  
成方知水行將季木運伊始天命有歸靈樂自降此蓋  
乾坤祐助宗廟致感方當降物和神祚隆萬世詔曰朕  
以菲薄何德可以當之此蓋天地祖宗之祐亦由公達  
鑒所致也俄改授禮部中大夫時猶因魏氏舊樂未遑

更造但云小呂加大呂而已紹遠上疏陳雅樂詔並行之紹遠所奏樂以八為數故梁黃門侍郎裴正上書以為昔者大舜欲聞七始下洎周武爰制七音持林鍾作黃鍾以為正調之首詔與紹遠詳議正曰天子用八非無典故縣而不擊未聞厥理且黃鍾為天大呂為地太簇為人今縣黃鍾而擊太簇便是虛天位專用人矣紹遠曰夫天不言四時行焉地不言萬物生焉人感中和之氣居變通之道今縣黃鍾而擊太簇是天子端拱羣

司奉職從此而議何往不可正曰案呂氏春秋曰楚之衰也為作巫音齊之衰也為作大呂且大呂以下七鍾皆是林鍾之調何得稱為十一月調專用六月之均便是欲迎仲冬猶存季夏以此而奏深非正理紹遠曰卿之所言似欲求勝若窮理盡性自伐更深何者案周禮祀天樂云黃鍾為宮大呂為角此則是大呂之用宛而成章雖知引呂氏之小文不覺失周公之大禮且今縣大呂則有黃鍾林鍾二均乃備春夏則奏林鍾秋冬則

奏黃鍾作黃鍾不擊大呂作林鍾不擊黃鍾此所謂左之右之君子宜之右之左之君子有之而卿不縣大呂止有黃鍾一宮便是季夏之時仍作仲冬之調以此為至理無乃不可乎然周禮又云乃奏黃鍾歌大呂以祀天神謂五帝及日月星辰也王者各以夏之正月祀炎帝於南郊又朝日以春分夕月以秋分依如正禮並用仲冬之調又曰乃奏太簇歌應鍾以祭地祇謂神州及社稷以春秋二仲依如正禮唯奏孟春之宮自外四望

山川先妣先祖並各用宮不依月變畧舉大綱則三隅  
可反然則還相為宮雖有其義引禮取證乃不月別變  
宮且黃鍾為君則陽之正位若隨時變易是若無定體  
而卿用林鍾以為正調便是若臣易位陰陽相反正之  
名器將何取焉正曰今用林鍾為黃鍾者實得相生之  
義既清且韻妙合真體然八音平濁何足可稱紹遠曰  
天者陽位故其音平而濁濁則君聲地者陰位故其音  
急而清清則臣調然急清者於體易絕平濁者在義可

久可久可大王者之基至於鄭衛新聲非不清韻若欲施之聖世吾所不取也於是遂定以八為數焉尋拜京兆尹歷少保小司空出為河州刺史河右戎落向化日近同姓婚姻因以成俗紹遠導之以禮大革弊風政存簡恕百姓悅服入為小宗伯武帝讀史書見武王克殷而作七始又欲廢八縣七并除黃鍾之正宮用林鍾為調首紹遠奏云天子縣八百王共軌下逮周武甫修七始之音詳諸經義又無廢八之典且黃鍾為君天子正

位今欲廢之未見其可臣案周禮奏黃鍾歌大呂此則  
先聖之弘範不易之明證願勿輕變古典趣改樂章帝  
默然久之曰朕欲廢七縣八者所望體本求直豈苟易  
名當更思其義後竟行七音屬紹遠邁疾未獲面陳慮  
有司遽捐樂器乃與樂部齊樹書曰伏聞朝廷前議而  
欲廢八縣七然則天子縣八有自來矣古先聖王殊塗  
一致逮周武克殷逆取順守專用干戈事乖揖遜反求  
經義是用七音蓋非萬代不易之典其縣八苟屢不得

毀之宜待吾疾瘳當別奏聞此後紹遠疾篤乃命其子覽曰夫黃鍾者天子之宮大呂者皇后之位今廢黃鍾之位而祿去王公若用林鍾為首是政出私門將恐八百之祚不得同姬周之永也吾既為人臣義無寢默必輿疾固爭闢庭後疾甚乃上遺表曰謹案春秋隱公傳云天子用八周禮云天子縣二八倕氏之鐘十六母句氏之磬十六漢成帝獲古磬十六周禮圖縣十六此數事者昭爛典章揚榷而言足為龜鏡伏惟陛下受圖蒼

帝接統元精秦漢以還獨為稱首至如周武有事干戈  
臣獨鄙之而況陛下以臣自揣餘息匪夕伊朝伏願珍  
御萬機不勞改八從七帝省表涕零重贈柱國大將軍  
謚曰獻號樂祖配饗廟庭子覽嗣覽列在隋史紹遠弟  
澄字士亮年十歲司徒李琰之見而奇之遂以女妻焉  
十四從父承業征討有智謀勇冠諸將以功封西華縣  
侯及長容貌魁岸風儀溫雅魏大統中歷位豫渭二州  
刺史以軍別封永寧縣伯尋進覆津縣侯魏文帝與文

帝及羣公宴從容曰孝經一卷人行之本諸君宜各引孝經之要言澄應聲曰夙夜匪懈以事一人座中有人次曰匡救其惡既出西閣文帝深歎澄之合機而譴其次答者孝閔帝踐阼拜大將軍進爵義門郡公出為玉壁總管頗有威信卒於鎮贈柱國謚曰簡自喪初至及葬明帝三臨之祭祀中大夫宇文容諫曰君臨臣喪自有節制今乘輿屢降恐乖典禮帝不從其為上所追惜如此子巒嗣

盧柔字子剛范陽涿人也祖洪魏樂陵陽平二郡太守父崇驃騎府法曹參軍柔少孤為叔母所養撫視甚於其子柔盡心溫清亦同己親親黨歎重之性聰敏好學未弱冠便解屬文但口吃不能持論頗使酒誕節為世所譏司徒臨淮王或見而器之以女妻焉及魏孝武懼齊神武之逼詔賀拔勝出牧荊州以為外援柔謂因此可以著功績遂從勝之荊州以柔為大行臺郎中掌書記軍之機務柔多預焉及勝為太保以柔為掾孝武後

召勝引兵赴洛勝以問柔柔對曰高歡託晉陽之甲意  
實難知公宜席卷赴都與決勝負存沒以之此忠之上  
策也若北阻魯陽南并舊楚東連兗豫西接關中帶甲  
十萬觀釁而動亦中策也舉三荆之地通款梁國可以  
庇身功名去矣策之下者勝輕柔年少笑而不應及孝  
武西遷東魏遣侯景襲穰勝敗南奔歸梁柔亦從之勝  
頻表染武帝求歸關中梁武帝覽表嘉其辭彩既知柔  
所製因遣舍人勞問并遺縑錦後與勝俱還行及襄陽

齊神武懼勝西入遣侯景以輕騎邀之勝及至懼乃棄  
船山行羸糧冒險經數百里時屬秋霖徒侣凍餒死者  
太半大統二年遂至長安封容城縣男文帝重其才引  
為行臺郎中除從事中郎與郎中蘇綽對掌機密時沙  
苑之役大軍屢捷汝颍之間多舉義來附書翰往返日  
百餘牒柔隨機報答皆合事宜進爵為子累遷中書侍  
郎兼著作撰起居注後為黃門侍郎文帝知其貧解衣  
賜之後遷中書監孝閔帝踐阼拜小內史大夫進位儀

同三司卒於位所作詩頌碑銘檄表啓行於世者數十  
篇子愷嗣愷列在隋史

裴俠字嵩和河東解人也祖思齊舉秀才拜議郎父欣  
西河郡守贈晉州刺史俠年七歲猶不能言後於洛城  
見羣鳥蔽天從西來舉手指之而言遂智識聰慧有異  
常童年十三遭父憂哀毀有若成人將擇葬地而行忽  
聞空中有人言曰童子何悲葬於桑東當封公侯俠懼  
以告其母母曰神也吾聞鬼神福善爾家未嘗有惡當

以吉祥告汝耳時俠宅側有大桑林因葬焉州辟主簿  
舉秀才魏正光中解巾奉朝請稍遷義陽郡守元顥入  
洛俠執其使人焚其赦書孝莊嘉之授東郡太守帶防  
城別將及孝武與齊神武有隙徵兵河南以備之俠率  
所部赴洛陽武衛將軍王思政謂曰當今權臣擅命王  
室日卑若何俠曰宇文泰為三軍所推居百二之地所  
謂已操戈矛寧肯授人以柄雖欲撫之恐是據於蒺藜  
也思政曰柰何俠曰圖歡有立至之憂西巡有將來之

慮且至關右日慎一日徐思其宜耳思政然之乃進俠  
於帝授左中郎將及帝西遷俠將行而妻子猶在東郡  
滎陽鄭偉謂俠曰天下方亂未知烏之所集何如東就  
妻子徐擇木焉俠曰忠義之道庸可忽乎吾既食人之  
祿寧以妻子易圖也遂從入關賜爵清河縣伯除丞相  
府士曹參軍大統三年領鄉兵從戰沙苑先鋒陷陣俠  
本名協至是文帝嘉其勇決乃曰仁者必有勇因命改  
名俠焉以功進爵為侯王思政鎮玉壁以俠為長史齊

神武以書招思政思政令俠草報書辭甚壯烈文帝善之曰雖魯仲連無以加也除河北郡守俠躬履儉素愛民如子所食唯菽麥鹽菜而已吏民莫不懷之郡舊制有漁獵夫三十人以供郡守俠曰以口腹役人吾所不為也乃悉罷之又有丁三十人供郡守役使俠亦不以入私並收庸直為官市馬歲時既積馬遂成羣去職之日一無所取民歌之曰肥鮮不食丁庸不取裴公清惠為世規矩俠嘗與諸牧守俱謁文帝文帝命俠別立謂

諸牧守曰裴俠清慎奉公為天下最今衆中有如俠者可與之俱立衆皆默然無敢應者文帝乃厚賜俠朝野歎服號為獨立使君俠撰九世伯祖貞侯潛傳以為裴氏清公自此始也欲使後生奉而行之宗室中知名者咸付一通從弟伯鳳世彥時並為丞相府佐笑之曰人生仕進須身名俱泰清苦若此竟欲何為俠曰清者涖職之本儉者持身之基況我大宗世濟其美故能存見稱於朝廷沒流芳於典策今吾幸以凡庸濫蒙殊遇固

其窮困非慕名也志在自修懼辱先也翻被嗤笑知復  
何言伯鳳等慙而退再遷郢州刺史加儀同三司梁竟  
陵太守孫暠鄴城守張建並以郡來附俠見之密謂人  
曰暠目動言肆輕於去就者也建神情審定當無異心  
乃馳啓其狀文帝曰裴俠有知人之鑒深得之矣遣大  
都督苻貴鎮竟陵而鄴城竟不遣監統及柳仲禮軍至  
暠還以郢叛卒如俠言尋轉大將軍拓州刺史徵拜雍  
州別駕孝閔帝踐阼除司邑下大夫加驃騎大將軍開

府儀同三司進爵為公遷戶部中大夫時有姦吏主守倉儲積年隱沒至千萬者及俠在官勵精發擿數旬之內姦盜畧盡轉工部中大夫有大司空掌錢物典李貴乃於府中悲泣或問其故對曰所掌官物多有費用裴公清嚴有名懼遭罪責是以泣耳俠聞之許其自首貴自言隱費錢五百萬俠之肅姦皆此類也俠嘗遇疾沈頤士友憂之忽聞五鼓便即驚起顧左右曰可向府邪所苦因此而瘳晉公護聞之曰裴俠危篤若此而不廢

夏公因聞鼓聲疾病遂愈此豈天祐其勤恪也又司空  
許國公字文貴小司空北海公申徽並來候俠疾所居  
第屋不免霜露貴等還言之於帝帝矜其貧苦乃為起  
宅并賜良田十頃奴隸耕耒糧粟莫不備足搢紳咸以  
為榮卒於位贈太子少師蒲州刺史謚曰貞河北郡前  
功曹張回反吏民等感俠遺愛乃作頌紀其清德焉子  
祥性忠謹有理劇才少為成都令清不及俠斷決過之  
後除長安令為權要所憚遷司倉下大夫俠之終也以

毀卒祥弟肅列在隋史

裴寬字長寬河東聞喜人也祖德歡魏中書侍郎河內  
郡守父靜慮銀青光祿大夫贈汾州刺史寬儀貌瓌偉  
博涉羣書弱冠為州里所稱親歿撫諸弟以篤友聞榮  
陽鄭孝穆嘗謂其從弟文直曰裴長寬兄弟天倫篤睦  
人之師表吾愛之重之汝可與之游處年十三以選為  
魏孝明帝挽郎釋褐散騎侍郎及孝武西遷寬謂其諸  
弟曰君臣逆順大義昭然今天子西幸理無東西以虧

臣節乃將家屬避難於大石嶺獨孤信鎮洛陽始出見  
焉時汾州刺史韋子粲降於東魏子粲兄弟在關中者  
咸已從坐其季弟子爽先在洛窘急乃投寬寬開懷納  
之遇有大赦或傳子爽合免因爾遂出子爽卒以伏法  
獨孤信知而責之寬曰窮來見歸義無執送今而獲罪  
是所甘心以經赦宥遂得不坐大統五年授都督同軌  
防長史加征虜將軍十三年從防主韋法保向潁川解  
侯景圍景密謀南叛偽親狎於法保寬謂法保曰侯景

狡猾必不肯入關雖詭款於公恐未可信若伏兵斬之亦一時之功也如曰不然便須深加嚴警不得信其誑誘自貽後悔法保納其言然不能圖景但自固而已十四年與東魏將彭樂樂恂戰於新城因傷被禽至河陰見齊文襄寬舉止閑雅善於占對文襄甚賞異之解鎖赴館厚加禮遇寬乃裁所卧氈夜縋而出因得遁還見於文帝帝顧謂諸公曰彼堅執銳或有其人疾風勁草歲寒方驗裴長寬為高澄如此厚遇乃能冒死歸我雖

古之竹帛所載何以加之乃手書署寬名下授持節帥  
都督封夏陽縣男即除孔城城主十六年遷河南郡守  
仍鎮孔城魏廢帝元年進使持節車騎大將軍儀同三  
司散騎常侍孝閔帝踐阼進爵為子寬在孔城十三年  
與齊洛州刺史獨孤永業相對永業有謀計多譖詐或  
聲言春發秋乃出兵或掩蔽消息倏忽而至寬每揣知  
其情出兵邀擊無不克之天和三年除溫州刺史初陳  
氏與周通和修聘好自華皎附後乃圖寇掠沔州既接

敵境於是以外寬為沔州刺史陳將程靈洗攻之力屈城  
陷陳人乃執寬至揚州尋被送嶺外經數載復還建鄴  
遂卒於江左子義宣從御正杜果使於陳始得將寬柩  
還隋開皇元年文帝詔贈襄郢二州刺史義宣位司金  
二命士合江令寬弟漢字仲霄操尚弘雅聰敏好學嘗  
見人作百字詩一覽便誦魏孝武初釋褐員外散騎侍  
郎大統五年除大丞相府士曹行參軍轉墨曹漢善尺  
牘尤便簿領理識明贍斷割如流相府為之語曰日下

燦爛有裴漢武成中為司車路下大夫與工部郭彥太  
府高賓等參議格令每較量時事必有條理天和五年  
加車騎大將軍儀同三司漢少有宿疾常帶虛羸劇職  
繁官非其好也時晉公護擅權搢紳等多諂附之以圖  
仕進漢直道自守故八年不徙職性不飲酒而雅好賓  
游每良辰美景必招引時彥宴賞留連間以篇什當時  
人物以此重之自寬沒後遂斷游從不聽琴瑟歲時伏  
臘哀慟而已撫養兄弟子情甚篤至借人異書必躬自

錄本至于疾瘳彌年亦未嘗釋卷卒贈晉州刺史子鏡人少聰敏涉獵經史為大將軍譚公會記室參軍累遷春官府都上士仕隋位兵曹郎漢弟尼字景尼性弘雅有器局位御正下大夫卒贈隨州刺史子之隱趙王招府記室參軍之隱弟師人好學有識度見稱於時起家秦王贊府記室參軍仍兼侍讀寬族弟鴻少恭謹有幹畧歷官內外天和初拜郢州刺史轉襄州總管府長史賜爵高邑縣侯從衛公直南征軍敗遂沒尋卒於陳朝

廷哀之贈豐資三州刺史

裴果字戎昭河東聞喜人也祖思賢魏青州刺史父遵齊州刺史果少慷慨有志畧魏太昌中為陽平郡丞文帝曾使并州與果遇果知非常人密託附焉永安中盜賊蜂起果從軍征討乘黃驄馬衣青袍每先登陷陣時人號為黃驄年少永熙中授河北郡守及齊神武敗於沙苑果乃率其宗黨歸闕文帝嘉之賜田宅奴婢牛馬什物等從戰河橋解玉壁圍摧鋒陷擊所向披靡大統

九年又從戰芒山於文帝前挺身陷陣禽東魏都督賀  
婁焉遷蘭勇冠當時衆人莫不歎服以此文帝愈親待  
之補帳內都督遷帥都督平東將軍後從開府楊忠平  
隨安陸以功加大都督除正平郡守正平果本郡也以  
威猛為政百姓畏之然盜賊亦為之屏息遷司農卿又  
從大將軍尉遲迥伐蜀果率所部為前軍開劒閣破季  
慶堡降楊乾運皆有功廢帝三年授龍州刺史封冠軍  
縣侯俄而州人張遁李拓驅率百姓圍逼州城時糧仗

皆闕兵士又寡果設方畧以拒之賊便退走於是出兵追擊累戰破之旬月之間州境清晏轉陵州刺史孝閔帝踐阼除隆州刺史加持節驃騎大將軍開府儀同三司進爵為公歷眉復二州刺史果性嚴猛能斷決抑挫豪右申理屈滯歷牧數州號為稱職卒於位贈本官加絳晉建州刺史謚曰質子孝仁嗣孝仁幼聰敏涉獵經史有譽於時起家舍人上士累遷長寧鎮將捍禦齊人甚有威邊之畧歷建譙亳州刺史

裴文舉字道裕河東聞喜人也祖秀業魏天水郡守贈平州刺史父邃性方嚴為州里所推挹大統三年東魏來寇邃乃糾合鄉人分據險要以自固及李弼畧地東境遂為之鄉導多所降下文帝嘉之特賞衣物封澄城縣子卒於正平郡守贈開府儀同三司定州刺史文舉少忠謹涉獵經史大統十三年起家奉朝請文帝諸子年幼咸簡賓友文舉以選與諸公子游雅相欽敬未嘗戲狎遷著作郎中外府參軍魏恭帝二年賜姓賀蘭氏

孝閔帝踐阼襲爵澄城縣子齊公憲初開幕府以文舉  
為司錄及憲出鎮劖南復以文舉為總管府中郎武成  
二年就加使持節車騎大將軍儀同三司蜀土沃饒商  
販百倍或有勸文舉以利者文舉答之曰利之為貴莫  
若安身身安則道隆非貨之謂是以不為非惡財也憲  
矜其貧窶每欲資給之文舉恒自謙遜辭多受少保定  
三年遷絳州刺史遂之任正平也以廉約自守每行春  
省俗單車而已及文舉臨州一遵其法百姓美而化之

總管韋孝寬特相欽重每與談論不覺膝前於席天和初進驃騎大將軍開府儀同三司尋為孝寬柱國府司馬六年入為司憲中大夫進爵為伯轉軍司馬文舉少喪父其兄又在山東唯與弟璣幼相訓養友愛甚篤璣又早亡文舉撫視遺孤逾於己子時人以此稱之初文舉叔父季和為曲沃令終於聞喜川而叔母韋氏卒於正平縣屬東西分隔韋氏墳壘遂在齊境及文舉在本州每加賞慕齊人感其孝義潛相要結以韋枢西歸竟

得合葬六年除南青州刺史宣政元年卒於位子胄嗣位至大都督子神安邑通守有子知禮

崔猷字宣猷博陵安平人也祖挺魏司徒司馬父孝芬吏部尚書為齊神武所誅事具挺傳猷少好學風度閑雅性鯁正有軍國籌畧普泰初累遷司徒從事中郎既遭家難遂間行入關及謁魏孝武哀動左右帝為之改容目送曰忠孝之道萃在一門即以本官奏門下事大統初兼給事黃門郎平原縣伯二年正黃門行軍擒竇

泰復弘農破沙苑猷常以本官從軍典文翰五年除司徒左長史加驃騎將軍時太廟初成四時祭祀猶設俳優角抵之戲其郊廟祭官多有假兼猷上疏諫書奏並納焉遷京兆尹時婚姻禮嫁聚會之辰多舉音樂又壘里富室衣服奢淫乃有織成文繡者猷請禁斷事並施行與盧辯等剏修六官十二年除淅州刺史十四年侯景據河南歸款遣行臺王思政赴之文帝與思政書曰崔宣猷智畧明贍有應變之才若有所疑宜與量其可

不思政初頓兵襄城後於潁川為行臺并致書於猷猷  
復曰襄城控帶京洛實當今之要地如有動靜易相應  
接潁川既隣寇境又無山川之固賊若潛來徑至城下  
莫若頓兵襄城為行臺所潁川置州遣郭賢守則表裏  
膠固人心易安縱有不虞豈能為患使人見文帝具以  
啓聞文帝令依猷策思政重啓求與朝廷立約賊若水  
攻乞一周為斷陸攻請三歲為期限內有事不煩赴援  
過此以往唯朝廷所裁乃許之及潁川沒文帝深追悔

焉以疾去職屬大軍東征文帝賜以馬隨軍與之籌畧  
十七年進侍中驃騎大將軍開府儀同三司本州大中  
正賜姓宇文氏魏恭帝元年文帝欲開梁漢舊路乃命  
獻督儀同劉道通等五人開通車路鑿山堙谷五百餘  
里至於梁州即以獻為都督梁州刺史及文帝崩始利  
涉興等諸州阻兵為逆信合開楚四州亦叛唯梁州境  
內人無二心利州刺史崔士謙請援獻遣兵六千赴之  
信州糧盡獻為送米四千斛於是二鎮獲全獻第二女

帝養為己子封富平公主明帝即位徵拜御正中大夫時依周禮稱天王又不建年號獻以為世有澆淳故帝王因以沿革今天子稱王不足以威天下請遵秦漢稱皇帝建年號朝議從之除司會中大夫御正如故明帝遺詔立武帝晉公護謂獻曰魯公稟性寬仁在文帝諸子之中年又最長今遵奉遺旨翊戴為主君以為如何獻曰殷道尊尊周道親親今朝廷既遵周禮無容輒違此義護曰天下事大恐冀公幼耳獻曰昔周公輔成王

以朝諸侯況明公親賢莫二若行周公之事方為不負  
顧託事雖不行當時稱其守正及陳將華皎來附晉公  
護議欲南伐公卿莫敢言猷獨進曰前歲東征死傷過  
半比雖加撫循而創痍未復近者長星為災乃上元所  
以垂鑒誠也豈可窮兵極武而重其譴責哉護不從後  
水軍果敗而裨將元定等遂沒江南建德六年拜少司  
徒加上開府儀同大將軍隋文帝受禪以猷前代舊齒  
授大將軍進爵汲郡公開皇四年卒謚曰明子仲方列

在隋史猷弟宣度位齊王開府司馬恒農太守宣度弟  
宣軌有才學位考功郎中與弟宣質宣靜宣畧並早卒  
崔士謙字士遜博陵安平人也祖辯魏武邑太守父楷  
殷州刺史辯自有傳士謙幼聰明神彩嶷然及長深沈  
有識量厯觀經史不持章句志在博聞而已每覽經國  
緯民之事心常好之未嘗不撫卷歎息孝昌中解褐著  
作郎賀拔勝出鎮荊州以士謙為行臺左丞勝雖居方  
岳之任至於安輯夷夏綱紀衆務皆委士謙焉士謙亦

盡其智能以相佐佑勝有聲南州皆士謙之力也及魏孝武將備齊神武之逼乃詔勝引兵赴洛軍至廣州帝已西遷勝乃遲疑將旋士謙謂勝曰昔周室不造諸侯釋位漢祚中微列藩盡節今皇家多故主上蒙塵斯實忠臣枕戈之時義士立功之日公受方面之重總宛葉之衆若仗義而動首唱勤王天下聞風孰不感激誠宜倍道兼行謁帝關右然後與宇文行臺同心協力電討不庭則二伯之勲復興茲日中道而退人皆解體一失

事機後悔何及勝不能用人情果大駭動州民劉誕引  
侯景軍奄至勝與戰敗績遂將麾下數百騎奔梁士謙  
亦隨行及至梁每乞師赴援梁武雖不為出軍而嘉勝  
等志節並許其還國乃令士謙先且通隣好文帝素聞  
其名甚禮之授征西將軍賜爵千乘縣男及勝至拜太  
師長史以功賜爵為子拜尚書右丞從文帝解洛陽圍  
經河橋戰加定州大中正瀛州刺史又破柳仲禮於隨  
郡討李遷哲於魏興並有功進驃騎大將軍開府儀同

三司直州刺史賜姓宇文氏恭帝初轉利州刺史士謙性明悟深曉政術吏民畏而愛之保定二年遷總管安州刺史加大將軍進爵武康郡公天和三年授江陵總管荊州刺史既統攝遐方俗兼夷夏又南接陳境東隣齊寇士謙外禦彊敵內撫軍民風化大行號稱良牧每年考績常為天下之最屢有詔褒美焉士謙隨賀拔勝之在荊州也雖被親遇而名位未顯及踐其位朝野以為榮四年卒於州閨境痛惜之立祠堂四時祭饗子曠

嗣士謙性至孝與弟訛特相友愛雖復年位並高資產  
皆無私焉居家嚴肅曠及訛子弘度並奉其遺訓云曠  
少溫雅隋大業末位開府儀同三司大將軍淅州刺史  
曠弟彭有盛名列在後史訛本名士約少有氣槩膂力  
過人尤工騎射賀拔勝攻荊州以為假節冠軍將軍防  
城都督又隨奔梁復自梁歸西魏授武衛將軍都督封  
安昌縣子後文帝復弘農戰沙苑皆有功進爵為侯除  
京兆郡守累遷都官尚書定州大中正改封安固縣侯

賜姓宇文氏并賜名訖焉進驃騎大將軍開府儀同三司加侍中進爵高平縣公再遷總管涼州刺史訖涖政彊毅百姓畏之後除使持節能和忠三州崇德等十三防諸軍事加授大將軍改封安平縣公建德四年卒贈廓延等五州刺史謚曰壯子弘度仕周歷隋性酷虐列在酷吏傳中

李昶小名那頓丘衛國人魏御史中尉彪之孫也彪自有傳昶伯父志為南荊州刺史父游隨志在任建義初

與志俱奔江左昶性峻急不雜交游幼年已解屬文有聲洛下時洛陽初置明堂昶年十數歲為明堂賦雖優洽未足才制可觀見者咸曰有家風也初謁文帝文帝深奇之厚加資給令入太學文帝每見學生必問才行及問昶昶神情清悟應對明辯文帝稱歎之綏德公陸通盛選僚佐請以昶為司馬文帝許之昶雖年少通特見接待公私之事咸取決焉又兼二千石郎中典儀注累遷都官郎中相州大中正昶雖處郎官文帝恒欲以

書記委之於是為丞相府記室參軍著作郎修國史轉  
大行臺郎中中書侍郎又轉黃門侍郎封臨黃縣伯嘗  
謂曰卿祖昔在中朝為御史中尉卿操尚貞固理應不  
墜家風但孤以中尉彈劾之官愛憎所在故未即授卿  
耳然此職久曠無以易卿乃奏袒為御史中尉賜姓宇  
文氏六官建拜內史下大夫進爵為侯明帝初行御伯  
中大夫武成元年除中外府司錄保定初進驃騎大將  
軍開府儀同三司轉御正中大夫時以近侍清要盛選

國華乃以昶及安昌公元則中都公陸逞臨淄公唐瑾等並為納言尋進爵為公五年出為昌州刺史在州遇疾求入朝詔許之未至京卒贈相瀛二州刺史昶文帝世已當樞要兵馬處分專以委之詔策文筆皆昶所作也及晉公護執政委任如舊昶常曰文筆之事不足流於後世經邦致化庶及古人故所作文筆了無藁草唯留心政事而已又以父在江南身寓關右自少及終不飲酒聽樂時論以此稱焉子丹嗣

鄭道邕字孝穆滎陽開封人也祖敬叔魏濮陽太守父瓊范陽太守道邕幼謹厚以清約自居年未弱冠涉獵經史父叔四人並早歿昆季之中道邕居長撫訓諸弟有如同生閨門之中怡怡如也魏孝昌初解褐太尉行參軍累以戰功進至光祿大夫太師咸陽王長史及孝武西遷從入關除司徒左長史領臨洮王友賜爵永寧縣侯大統初行岐州刺史在任未幾有能名王罷時為雍州刺史欽其善政貽書盛相稱述先是所部百姓久

遭離亂逃散殆盡道邕下車之日戶止三千留情綏撫  
遠近咸至數年之內有四萬家歲考績為天下最文帝  
賜書歎美之徵拜京兆尹及梁岳陽王蕭譽稱藩乃假  
道邕散騎常侍持節拜譽為梁王使還稱旨進儀同三  
司加散騎常侍時文帝東討除大丞相府右長史封金  
鄉縣男軍次潼關命道邕與左長史孫儉司馬楊寬尚  
書蘇亮諮議劉孟良等分掌衆務仍令道邕引接關東  
歸附人士并品藻才行而任用之撫納銓敘咸得其宜

後拜中書令賜姓宇文氏尋以疾免孝閔帝踐阼加驃  
騎大將軍開府儀同三司進爵為子歷御伯中大夫御  
正宜華虞陝四州刺史頻歷數州皆有政績入為少司  
空卒贈本官加鄭梁北豫三州刺史謚曰貞子詡嗣歷  
位納言為聘陳使後至開府儀同大將軍邵州刺史詡  
弟譯於隋文帝有翊贊功開皇初又追贈道邕大將軍  
徐充等六州刺史改謚曰文譯隋史有傳

鄭偉字子直道邕之族子也父先護魏孝莊世尚書右

僕射為爾朱仲遠所害先護事具從曾祖秘書監義傳  
中偉少倜儻有大志每以功名自許善騎射膽力過人  
初仲遠之入洛也偉逃奔梁及爾朱氏滅後自梁歸魏  
及孝武西遷偉亦歸鄉里不求仕進大統三年河內公  
獨孤信既復洛陽偉乃與宗人榮業糾合州里舉兵於  
陳留信宿間衆有萬人遂拔梁州禽東魏刺史鹿永及  
鎮城守將令狐德并獲陳留郡守趙季和乃率衆西附  
因是梁陳間相次降款偉馳入關西文帝與語歎美之

拜北徐州刺史封武陽縣伯從戰河橋反解玉璧圍偉常先鋒陷陣侯景歸歟文帝命偉率所部應接及景叛偉亦全軍而還除滎陽郡守進爵襄城郡公侍中驃騎大將軍開府儀同三司魏恭帝二年進位大將軍江陵防主都督十五州諸軍事偉性麤獷不遵法度睚眦之間便行殺戮朝廷以其立義之效每優容之及在江陵乃專戮副防主杞賓工坐除名保定元年詔復官爵天和六年為華州刺史偉前後蒞職皆以威猛為政吏民

莫敢犯禁盜賊亦為之休止雖非仁政然頗以此見稱  
卒於州贈本官加少傅都督司州刺史諡曰肅偉性吃  
少時嘗逐鹿於野失之遇牧豎問焉牧豎答之其言亦  
吃偉怒謂其效己遂射殺之其忍暴如此子大士嗣

司馬裔字遵允河內溫人也晉宣帝弟太常卿馗之後  
曾祖楚之屬宋武帝誅晉氏戚屬避難歸魏位至鎮西  
將軍封琅邪王楚之生吏部尚書金龍金龍生豫州刺  
史悅悅生裔裔少孤有志操州郡辟召並不應後起家

司徒府參軍以軍功授員外散騎常侍及魏孝武西遷  
裔時在鄴志在立功潛歸鄉里大統三年於溫起義及  
六軍西征裔乃於溫送欵遂率所部從戰有功六年授  
北徐州刺史八年入朝文帝嘉之特蒙賞勞頃之河內  
有四千餘家歸附並裔之鄉舊乃命領河內郡守令安  
集流民十五年文帝令山東立義諸將能率衆入關者  
並加重賞裔領戶千室先至文帝欲以封裔裔固辭曰  
立義之士辭鄉里捐親戚遠歸皇化者皆是其誠心內

發豈裔能率之乎今以封裔便是賣義士以取榮非所  
願也文帝善而從之授帥都督拜其妻元為襄城郡公  
主孝閔帝踐阼除巴州刺史進使持節驃騎大將軍開  
府儀同三司進爵琅邪伯四年為御正中大夫進爵為  
公大軍東討裔與少師楊欽守軼關即授懷州刺史天  
和初信州蠻酋冉令賢等反連結二千餘里裔隨上庸  
公陸騰討之裔自開州道先入晝夜攻圍腹背受敵自  
春至秋五十餘戰賊黨糧仗俱竭乃降於是羣蠻率服

歷信潼二州刺史六年徵拜大將軍除西寧州刺史未之部卒於京師裔性清約不事生產所得俸祿並散之親戚身死之日家無餘財宅舍卑陋喪庭無所詔為起祠堂焉贈本官加四州刺史謚曰定子侃嗣侃字道遷少果勇未弱冠便從戎旅位樂安郡守以軍功加驃騎大將軍開府儀同三司遷兗州刺史未之部卒贈本官加豫州刺史謚曰惠子運嗣

司馬消難字道融河內溫人也父子如為齊神武佐命

位尚書令自有傳消難幼聰慧微涉經史有風神好自  
矯飾以求名譽起家著作郎子如既當朝貴消難亦愛  
賓客邢子才王元景魏收陸卬崔瞻等皆游其門稍遷  
光祿卿出為北豫州刺史齊文宣末年昏虐滋甚消難  
既懼禍及常有自全之謀曲意撫納頗為百姓所附不  
能廉潔為御史所劾又尚公主而情好不睦公主憇之  
屬文宣在并州驛召上黨王渙渙懼害斬使者東奔鄆  
中大擾後竟獲於濟州渙之初走朝士疑赴成皋云若

與司馬北豫連謀必為國患此言達於文宣頗見疑消  
難懼密令所親裴藻間行入關請舉州來附晉公護遣  
達奚武楊忠迎之消難入朝授大將軍封滎陽公累遷  
大司寇從武帝東伐還除梁州總管大象初遷大後丞  
遂納女為靜帝后尋出為郢州總管隋文帝輔政消難  
既聞蜀公尉遲迥不受代遂欲與迥合勢亦舉兵應之  
使其子永質於陳以求援隋文帝命襄州總管王誼為  
元帥發荆襄兵以討之八月消難聞軍將至夜率其麾

下奔於陳初楊忠之迎消難結為兄弟情好甚篤隋文  
每以叔禮事之及陳平消難至京特免死配為樂戶經  
二旬放免猶被舊恩特蒙引見尋卒於家消難性貪淫  
輕於去就故世言反覆者皆以方之其妻高齊神武女  
也在鄴極加禮敬入關便相棄薄及赴祁州留妻及三  
子在京妻言於文帝曰滎陽公攜寵自隨必不顧妻子  
願防慮之及消難入陳高母子因此獲免子譚即高氏  
所生以消難勲拜儀同大將軍坐消難除名裴藻字文

芳少機辯有不羈之志為子如太傅主簿消難鎮北豫  
又以為中兵參軍入周封聞喜縣男除晉州刺史

薛端字仁直本名沙陁河東汾陰人也祖驥駒魏中書  
博士徙居馮翊之夏陽父英集書侍御史通直散騎常  
侍端少有志操遭父憂居喪合禮與弟裕勵精篤學不  
交人事年十七司空高乾邕辟為參軍賜爵平陰男端  
以天下擾亂遂棄官歸鄉里魏孝武西遷文帝令大都  
督薛崇禮據龍門引端同行崇禮尋失守降東魏東魏

遣行臺薛脩義督乙干貴西度據楊氏壁端與宗親及  
家僮等先在壁中脩義乃令其兵逼端等東渡方欲濟  
河會日暮端密與宗室及家僮等叛之脩義亦遣騎追  
端且戰且馳遂入石城柵得免柵中先有百家端與并  
力固守貴等數來慰喻知端無降意遂拔還河東東魏  
又遣其將賀蘭懿南汾州刺史薛琰達守楊氏壁端率  
其屬并招喻村人多設奇兵以臨之懿等疑有大軍便  
東遁赴船溺死者數千人端收其器械復還楊氏壁文

帝遣南汾州刺史蘇景恕鎮之降書勞問徵端赴闕以  
為大丞相府戶曹參軍從禽竇泰復弘農戰沙苑並有  
功進爵為伯後改封交城縣伯累遷吏部郎中端性彊  
直每有奏請不避權貴文帝嘉之故賜名端欲令名實  
相副自居選曹先盡賢能雖貴游子弟才劣行薄者未  
嘗升擢之每啓文帝云設官分職本康時務苟非其人  
不如曠職文帝深然之大統十六年軍東討柱國李弼  
為別道元帥妙簡英僚數日不定文帝謂弼曰為公思

得一長史無過薛端弼對曰真才也乃遣之轉尚書右丞仍掌選事染主蕭讐曾獻馬瑙鍾文帝執之顧丞郎曰能擲擣捕頭得盧者便與鍾已經數人不得項至端乃執擣捕而言曰非謂此鍾可貴但露其誠耳便擲之五子皆黑文帝大悅即以賜之魏帝廢近臣有勸文帝踐極文帝召端告之端以三方未一遽正名號示天下以不廣請待龕翦僭偽然後俯順樂推文帝撫端背曰成我者卿也卿心既與我同身豈與我異遂脫所著冠

帶袍袴並以賜之進授吏部尚書賜姓宇文氏端久處  
選曹雅有人倫之鑒其所擢用咸得其才六官建拜軍  
司馬加侍中驃騎大將軍開府儀同三司進爵為侯孝  
閔帝踐阼再遷戶部中大夫進爵為公晉公護將廢帝  
召羣臣議之端頗具同異護不悅出為蔡州刺史為政  
寬惠吏民愛之轉基州刺史基州地接梁陳事藉鎮撫  
總管史寧遣司馬梁榮催令赴任蔡州父老訴榮請留  
端者千餘人至基州未幾卒遺誠薄葬府州贈遺勿有

所受贈本官加大將軍進封文城郡公謚曰質子胄嗣  
胄列在隋史端弟裕字仁友少以孝悌聞於州里弱冠  
丞相參軍事時京兆韋夏志安放逸不干世務裕慕其  
恬靜數載酒肴候之談宴終日復遂以孫女妻之裕嘗  
謂親友曰大丈夫當聖明之運而無灼然文武之用為  
世所知雖復栖遲徒為勞苦耳至如韋居士退不丘壑  
進不市朝怡然守道榮辱弗及何其樂也裕曾宿宴于  
韋之廬後庭有井裕夜出戶若有人欲牽其手裕便却

行遂落井同坐共出之因勸裕酒曰向慮卿不測憂幸得無他宜盡此爵裕曰墜井蓋小小耳方當逾於此也人問其故裕曰近夢恐有兩楹之憂尋卒文章之士誅之者百數人文帝傷惜之追贈洛州刺史

薛善字仲良端之族曾孫也父和南青州刺史善少為司空府參軍再遷監池都將魏孝武西遷東魏改河東為秦州以善為別駕善家素富僮僕數百人兄元信仗氣豪侈每食方丈坐客恒滿絃歌不絕而善獨恭已率

素愛樂閑靜大統三年齊神武敗於沙苑留善族兄崇  
禮守河東文帝遣李弼圍之崇禮固守不下善密謂崇  
禮曰高歡戎車犯順致主上播越與兄忝是衣冠緒餘  
受國榮寵今大軍已臨而兄欲為高氏盡力若城陷之  
日送首長安云逆賊某甲之首死而有靈豈不殺有餘  
愧不如早歸誠款雖未足表竒節庶獲全首領崇禮猶  
持疑不決會善從弟馥妹夫高子信為防城都督守城  
南面子信遣馥來詣善云意欲應接西軍但恐力所不

制善即令弟濟將門生數十人與子信馥等斬關引弼  
軍入時預謀者並賞五等爵善以背逆歸順臣子常情  
豈容閹門大小俱叨封邑遂與弟慎等並固辭不受文  
帝嘉之以善為汾陰令善幹用彊明一郡稱最太守王  
羆美之令善兼督六縣事尋為行臺郎中時欲廣置屯  
田以供軍實乃除司農少卿領同州夏陽縣二十屯監  
又於夏陽諸山置鐵冶復以善為冶監每月役八千人  
營造軍器善親自督課兼加撫慰甲兵精利而皆忘其

勞苦焉遷大丞相從事中郎追論屯田功賜爵龍門縣  
子遷黃門侍郎除河東太守進驃騎大將軍開府儀同  
三司賜姓宇文氏六官建拜工部中大夫進爵博平縣  
公轉民部中大夫時晉公護執政儀同齊軌語善云兵  
馬萬機須歸天子何因猶在權門善白之護遂殺軌以  
善忠於己引為中外府司馬遷司會中大夫副總六府  
事加授京兆尹仍行司會出為隆州刺史兼益州總管  
府長史徵拜武威少府卒贈三司刺史武帝以善告齊

軌事謚曰繆公子襄嗣官至高陽郡守善弟慎字伯護  
好學能屬文善草書少與同郡裴叔逸裴諭之柳虬范  
陽盧柔隴西李璨友善起家丞相府墨曹參軍文帝於  
行臺省置學取丞郎及府佐德行明敏者充生悉令旦  
理公務晚就講習先六經而後子史又於諸生中簡德  
行淳懿者侍讀書慎與李璨及隴西李伯良辛韶武功  
蘇衡譙郡夏侯裕安定梁曠梁禮河南長孫璋河東裴  
舉薛同滎陽鄭朝等十二人並應其選又以慎為學師

以知諸生課業文帝雅好談論并簡名僧深識玄宗者  
一百人於第內講說又命慎等十二人兼學佛義使內  
外俱通由是四方競為大乘之學在學數年復以慎為  
宜都公侍讀累遷禮部郎中六官建拜膳部下大夫慎  
兄善又任工部並居清顯時人榮之孝閔帝踐阼除御  
正下大夫封淮南縣子歷師氏御伯中大夫保定初出  
為湖州刺史界既雜蠻夷恒以劫掠為務慎乃集諸豪  
帥具宣朝旨仍令首領每月一參或預言事者不限時

節慎每見必殷勤勸誠及賜酒食一年之間翕然從化  
諸蠻乃相謂曰今日始知刺史真民父母也莫不欣悅  
自是襁負而至者千餘戶蠻俗婚娶之後父母雖在即  
與別居慎謂守令曰牧守令長是化人者也豈有子娶  
妻便與父母離析非唯氓俗之失亦是牧守之罪慎乃  
親自誘導示以孝慈并遣守令各喻所部有數戶蠻別  
居數年乃還奉養及行得果膳歸奉父母慎以其從善  
之速具狀以聞有詔蠲其賦役於是風化大行有同華

俗尋為蕃部中大夫以疾去職卒於家有文集頗為世所傳

薛寘河東汾陰人也祖遵顏魏河東郡守安邑侯父乂清河廣平二郡守寘幼覽篇籍好屬文起家奉朝請從魏孝武西遷封邵陽縣子廢帝元年領著作佐郎脩國史尋拜中書侍郎脩起居注遷中書令燕公于謹征江陵以寘為司錄軍中謀畧寘並參之江陵平進爵為伯朝廷方改物創制欲行周禮乃令寘與小宗伯盧辯斟

酌古今共詳定行之六官建授內史下大夫孝閔帝跋  
陞進爵為侯轉御正中大夫時前中書監盧柔學業優  
深文藻華贍而寘與之方駕故世號曰盧薛焉久之進  
位驃騎大將軍開府儀同三司出為浙州刺史卒於位  
吏民哀惜之贈虞州刺史謚曰理所著文集二十餘卷  
行於世又撰西京記三卷引據該洽世稱其博聞焉寘  
性至孝雖年齒已衰職務繁廣至於溫清之禮朝夕無  
違當時以此稱之子明嗣大象末儀同大將軍清水郡

守

薛燈字景猷河東汾陰人也曾祖弘敞值赫連之亂率宗人避地襄陽燈早喪父家貧躬耕以養祖母有暇則覽文籍疎宕不拘時人未之奇也江表取人多以世族燈世無貴仕解褐不過侍郎既羈旅不被擢用常歎曰豈能五十年戴幘死一校尉低頭傾首俯仰而向人也常鬱鬱不得志每在人間輒陵架勝達負才使氣未嘗趨世祿之門左中郎將京兆韋潛度謂之曰君門地非

下身才不劣何不裝裾數參吏部澄曰世胄躡高位英俊沈下僚古人以為歎息竊所未能也潛度告人曰此年少實慷慨但不遭時耳孝昌中杖策還洛陽先是澄從祖真度與族祖安都擁徐兗歸魏其子懷雋見澄甚相親善屬爾朱榮廢立澄遂還河東止懷雋家不交人物終日讀書手自抄畧將二百卷唯郡守元襲時相要屈與之抗禮懷雋謂澄曰汝還鄉里不營產業不肯娶妻豈復欲南乎澄亦不介意普泰中拜給事中加伏波

將軍及齊神武起兵憕乃東游陳梁間謂族人孝通曰  
高歡阻兵陵上喪亂方始關中形勝之地必有霸王據  
之乃與孝通俱游長安侯莫陳悅聞之召為行臺郎除  
鎮遠將軍步兵校尉及悅害賀拔岳軍人咸相慶慰憕  
獨謂軍司傅長高曰悅才畧本寡輒害良將敗亡之事  
其則不遠吾屬今即為人所虜何慶之有乎長高以憕  
言為然並有憂色尋而文帝平悅引憕為記室參軍孝  
武西遷授征虜將軍中散大夫封夏陽男魏文即位拜

中書侍郎加安東將軍大統四年宣光清徽殿初成燈  
為之頌魏文又造二欹器一為二仙人共持一鉢同處  
一盤鉢蓋上有山山有香氣一仙人又持金瓶以臨器  
上傾水灌山則出於瓶而注乎器煙氣通發山中謂之  
仙人欹器一為二荷同處一盤相去盈尺中有蓮下垂  
器上以水注荷則出於蓮而盈乎器為鳬鴈蟾蜍以飾  
之謂之水芝欹器二盤各處一牀鉢圓而牀方其中有  
人三才之象也皆置清徽殿前器形似觥而方滿則平

溢則傾。澄各為頌，皆為時所稱。大統初，儀制多闕。文帝令澄與盧辯、檀翥等參定之。自以流離世故，不聽音樂。雖幽室獨處，嘗有戚容。後坐事賜死，子舒嗣官至禮部下大夫。儀同大將軍聘陳使副。

通志卷一百五十七



總校官庶吉士臣侍朝

校對官庶吉士臣陳文樞

謄錄監生臣孟錫山